

uma'erekō e ma'e romo zutyka'i ko 'ar rehe. Zanerywyr romo tuwe hekon a'e kury, ta'e uzeruzar Zaneruwhawete rehe xe. Kwa azamutar katu azeharomoete ihe pa. Ne nehe no ty, ezamutar katu wera'u nehe no ty. Ta'e a'e newe uma'erekō e ma'e romo hekon a'e xe, ta'e nerywyr romo hekon a'e no xe.

17 Ihe nerupi uma'erekō ma'e romo aiko ihe. A'e rupi, aze mo aha nepyr, a'e mehe mo hemuixe katu kar mo pe neràpuz me. Nezewegatete One a'e nehe, emuixe katu kar neràpuz me nehe. Aze ikatu ma'e rehe nepurapo wer ihewe, a'e mehe ezapo nezewe izupe nehe. **18** Kwehe mehe ikatu 'ym ma'e uzapo newe. Aze unewer ma'e rehe newe, a'e mehe amekuzar putar ihe nehe. **19** Hupo pupe amuapyk heze'eg pape rehe xe ihe kury. Amekuzar putar One inewer awer newe ihe nehe kury. Ne nehe no ty, nema'enukwaw katu ko ma'e rehe nehe no ty. Aze mo namume'u kwaw Tupàn ze'eg newe, a'e mehe mo nanepyro iwer mo a'e. **20** Herywyr. Ezapo ko ma'e ihewe nehe, ta'e ereiko uzeruzar ma'e romo xe. Hemurywete kar pe nehe ty, ta'e herywyr romo ereiko xe, ta'e Zaneruwhawete rehe zazeruzar zane xe.

21 Ezapo tuwe a'e ma'e newe hereminozgwer nehe ty. Kutàri, ko pape rehe

imuapyk mehe, akwaw ma'e newe hereminozgwer iapo àwàm ihe. Erezapo putar nehe. **22** Ezapokatu nepyr heker àwàm nehe. Ta'e Tupàn hemuhem kar putar zemunehew paw wi a'e nehe xe, hemono kar pà nepyr a'e nehe xe, ta'e nezewe haw erenoz izupe no xe.

Upaw etea'i kury

23 Epa a'e no, xe hepyr zemunehew paw pe hekon a'e no, ta'e umume'u Tupàn ze'eg a'e no xe. Omono kar uze'eg newe a'e no. — Nekatu ty, i'i newe. **24** Amogwer herupi uma'erekō ma'e a'e wà no. Mak, Aritak, Nem, Iruk. A'e paw omono kar uze'eg newe a'e wà no.

25 Zezuz Zaneruwhawete Zanezar a'e, tuwe ikatu ma'e uzapo peme a'e nehe.

Upaw kwez kury.

Pawru



EMEREW WÀ

Zutew wanupe ze'eg pape rehe imuapyk pyrer

1 Kwehe mehe Tupàn uze'eg tetea'u zaneipy wanupe a'e, zutew kwehe arer wanupe a'e. Uze'eg wanupe wapuahu pe. Wexak kar ma'e hexak pyr 'ym wanupe no. Omono kar weko haw pe har wanupe wà no, uze'eg imume'u kar pà wanupe wà no. Wexaexak amo awa a'e wà no, uze'eg imume'u pà wanupe no. A'e awa a'e wà, umume'u a'e ize'eg oho purupe a'e wà. **2** Ko 'ar rehe kury, Tupàn uze'eg iko purupe kury, wa'yr imono kar pà uze'eg imume'u har romo kury. Uzapo kar ywyw ywak wa'yr pe. Iahykaw

rehe ta'yir wereko putar ma'e paw rupi katete a'e nehe no. Wiko putar teko wazar romo nehe no, ta'e Tupàn hemixak kwer romo hekon a'e xe. **3** Ta'yir a'e, uhypate katu iko tatainy ài a'e, ta'e wereko Tupàn ikàgaw ipuràgaw uzehe a'e xe. Heko haw nuzawy kwaw Tupàn heko haw a'e. A'e ae nuzawy kwaw Tupàn a'e. Ywy a'e, ywak a'e no, ma'e paw rupi katete a'e wà no, teko paw rupi katete a'e wà no, wikuwe a'e wà, ta'e ta'yir umuigo kar iko a'e wà xe, uze'egaw ikàg ma'e pupe a'e wà xe. A'e ae umukatu teko a'e wà, wapyro pà wanemiapo kwer ikatu 'ym ma'e wi a'e wà. A'e re oho ywate kury, Tupàn

iawzye har rehe wapyk pà kury. Tupàn a'e, tuwihaw ikàg wera'u ma'e romo hekon a'e. Ta'yr wiko tuwihaw romo u ipyr a'e no.

Uze'eg Tupàn ta'yr rehe a'e kury, Tupàn heko haw pe har wanehe a'e no

4 Tupàn umuigo kar wa'yr tuwihaw ikàg wera'u ma'e romo a'e, weko haw pe har wanuwi a'e. Omono her izupe no. — Hera'yr, i'l izupe. Her ywate wera'u waner wanuwi a'e no, amogwer weko haw pe har waner wanuwi a'e no. **5** Ta'e — Hera'yr, ni'l pixik kwaw wanupe a'e xe. Xo wa'yr pe zo uze'eg nezewe. — Ereiko hera'yr romo ne. Kutàri amume'u hera'yr romo nereko haw kwez ihe kury, i'l izupe. Tupàn nuze'eg pixik kwaw nezewe ni amo weko haw pe har wanupe. — Aiko putar tu romo nehe. Hera'yr romo hekon putar nehe, i'l izupe. **6** Tupàn umur kar wa'yripy ywy rehe. Imur kar etea'i mehe nezewe uze'eg izupe. — Hereko haw pe har paw rupi a'e wà nehe, umuwete katu putar hera'yr a'e wà nehe, i'l izupe. **7** Nezewe Tupàn uze'eg weko haw pe har wanupe. — Amuigo kar putar hereko haw pe har ywytu zàwenugar romo ihe wà nehe. Amuigo kar putar heremiruze'eg tata zàwenugar romo ihe wà nehe, i'l wanupe. **8** Nezewe i'l wa'yr pe no. — Tuweharupi ereruze'eg putar teko ne wà nehe. Nupaw pixik kwaw waneruze'egaw nehe, Tupàn. Tuweharupi ereiko putar teko wanuwhaw romo nehe. Erepureruze'egatu putar iko nehe, neze'eg iawy 'ym pà nehe. **9** Ikatu ma'e iapo haw ikatu tuwe newe. Ikatu 'ym ma'e iapo haw na'ikatu kwaw newe. A'e rupi ihe nezar ihe, uruexak kwez ihe. Urumurywete kar kwez ihe, tuwihaw romo nemuigo kar pà ihe. Nazapo kwaw nezewe nerehe we har wanupe. Namurywete kar kwaw nezewe ihe wà, i'l Tupàn wa'yr pe. **10** Nezewe uze'eg izupe a'e no. — Ne teko wazar ne. Izypy meheerezapo ywy. Nopo pupeerezapo ywak no. **11** Ywak a'e, ywy a'e no, ukàzym putar a'e wà nehe. Ne erepyta putar nehe. Ywak ywy izymànerahy putar kamir ài wà nehe.

12 Erekanakanaw putar ywy nehe, ywak nehe no, kamir ài nehe. Teko weityk kamir

izemàner ma'e a'e wà, ipyahu ma'e ime'eg kar pà a'e wà. Nezewegateteerezapo putar amo ae ywy nehe, ipyahu ma'e nehe, ko ywy hekuzaromo nehe. Erezapo putar ywak ipyahu ma'e nehe no. Xo ne zo nereiko pixik kwaw izemànahy ma'e romo nehe. Tuweharupi ereiko putar nezewegatete nehe. Nereiko pixik kwaw amo ae ma'e romo nehe, i'l izupe. **13** Tupàn nuze'eg pixik kwaw nezewe, amogwer weko haw pe har wanupe. Xo wa'yr pe zo uze'eg nezewe. Nezewe i'l izupe. — Azo'ok putar wakàgaw ihe nehe, neàmàtyry'ymar wanuwi ihe nehe. Nereruzar putar a'e wà nehe, Amo 'ar mehe a'e wà nehe. A'e 'ar hàro mehe, ereiko putar heruwake nehe. Ereapyk putar heruwake nehe, i'l wa'yr pe. **14** Ma'e romo Tupàn heko haw pe har wanekon a'e wà. Tekwe romo wanekon wà. Uzapo ma'e oho waiko Tupàn pe wà, uzar pe wà. Tupàn omono kar a'e weko haw pe har ywy rehe a'e wà. Ywy rehe waneko mehe upptywà Tupàn pyr oho ma'e ràm waiko wà, Tupàn hemipyro ràm waptywà pà wà.

Tupàn zanepyro tuwe a'e

2 **1** A'e rupi zazekaiw wera'u tuwe ze'eg azeharomoete har rehe nehe, ze'eg zanereminu kwer rehe nehe. A'e rupi ni amo nazanemuizeruzar kar kwaw wemù'emaw rehe a'e wà nehe. **2** Tupàn heko haw pe har umume'u a'e ze'eg purupe a'e wà. Azeharomoete a'e ze'eg a'e. Tupàn ukwaw kar a'e ze'eg azeharomoete har purupe a'e. Aze teko nuzeruzar kwaw hehe wà nehe, aze nuweruzar kwaw wà nehe, Tupàn uzepyk putar a'e teko wanehe nehe. **3** Tupàn ikatuahy a'e, ta'e upurupyro iko tatahu wi a'e xe, ikatu 'ym ma'e wi a'e xe. Aze nazazekaiw kwaw a'e zepyro haw rehe nehe, nazapuner kwaw zanehemaw rehe zepykaw wi nehe. Zanezar ràgypy umume'u a'e zepyro haw a'e, ko ywy rehe wiko mehe a'e. Henu har a'e wà, umume'u zanewe a'e wà no. — Azeharomoeteahy ko ureze'eg ure, i'l zanewe wà, Zezuz ze'eg imume'u mehe zanewe wà. **4** A'e 'ar mehe we Tupàn uzapo kar purumupptyhegatu kar haw teko wanuwa

rupi no, ukàgaw hexak kar pà purupe no. Uzapo kar ma'e hexak pyr 'ym no. Umur Wekwe Puràg no, Zezuz rehe uzeruzar ma'e wanupe no. Tekwe Puràg uzapo kar ma'e ikatuahy ma'e wanupe pitàitaigatu no, ta'e Tupàn uputar nezewe haw a'e xe.

**Zezuz Zaneruwihawete wiko zanepyro
har romo a'e**

5 Urumume'u ywy iapo awer kwez peme ure. Ywy iapo mehe Tupàn numuigo kar kwaw weko haw pe har ywy rehe har wanuwihiaw romo a'e wà. 6 Nan kwaw nezewe pa. Nezewe i'i Tupàn ze'eg kwehe arer a'e, pape rehe imuapyk pyrer a'e.

— Ne Tupàn ne, nema'enukwaw ywy rehe har wanehe ne.

Nuiko kwaw ikàg ma'e romo a'e wà.
Nema'enukwaw katu wanehe.

7 Awa neremuigo kar kwaw ikàg ma'e romo ne.

Nerekò haw pe har ikàg wera'u ywy rehe har wi a'e wà.

Eremuigo kar awa kwez ikàg wera'u ma'e romo kury.

Eremono nekàgaw nepuràgaw kwez izupe,
i'i Tupàn ze'eg kwehe arer.

8 Pureruze'eg ma'e romo eremuigo kar kwez kury.

Wiko putar ma'e wazar romo paw rupi katete nehe no,

— Awa ma'e paw wazar romo hekon a'e, teko paw wanuwihiaw romo hekon a'e, i'i ze'eg kwehe arer. Mâràzàwe tuwe aipo pa. Ko 'ar rehe ni amo awa nuiko kwaw ma'e paw wazar romo wà. Ni amo nuiko kwaw teko paw wanuwihiaw romo wà. Nan. 9 Zezuz wiko putar ma'e paw wazar romo a'e nehe, teko paw wanuwihiaw romo a'e nehe no. Amo 'ar mehe Tupàn heko haw pe har ikàg wera'u izuwi a'e wà. Ta'e uezapo ikàg 'ym ma'e romo a'e xe. A'e rupi upuner umàno haw rehe teko wanekuzaromo paw rupi. Ta'e Tupàn zanepuhareko katu a'e xe. Ko 'ar rehe Tupàn umuigo kar Zezuz tuwhawete romo kury.

Omono ukàgaw upuràg eteahy haw izupe a'e no, ta'e Zezuz umàno teko wanekuzaromo a'e xe. 10 Tupàn uzapo ma'e paw rupi katete a'e wà, teko paw rupi katete a'e wà no. Zaneapo a'e no. Iporomono wer ukàgaw rehe upuràgaw rehe purupe a'e. A'e rupi nezewe uze'eg uezupe. — Aze hera'yr upuraraw ma'erahy a'e nehe, teko wanekuzaromo a'e nehe, xo a'e mehe zo apuner wapyro haw rehe tatahu wi ihe nehe. Xo a'e mehe zo nazepyk kwaw wanehe nehe, i'i Tupàn uezupe. A'e rupi upuraraw kar ma'erahy wa'yur pe, imumàno kar pà. Ukweraw mehe a'e ràgypy uezupir oho ywate a'e, wemipyro kwer wanenataromo a'e, wanape ràm iapo har ài a'e. Hemipyro kwer a'e wà nehe, ywy rehe har wanuwihiaw romo wanekon putar a'e wà nehe. Umàno mehe Zezuz upyro tuwe ikatu 'ym ma'e iapo har a'e wà, tatahu wi a'e wà.

11 Zezuz umukatu teko a'e wà, wanemiapo kwer ikatu 'ym ma'e wi a'e wà. Tupàn ta'yromo hekon a'e. Hemimukatu kwer a'e wà no, wereko Tupàn u romo a'e wà no. A'e rupi Zezuz na'imaranugar kwaw wanehe uze'eg mehe a'e. — Herywyr wà, i'i iko wanupe.

12 Nezewe i'i Zezuz.

— Tupàn, amume'u putar nekatu haw herywyr wanupe ihe nehe.

Amume'u katu putar nekàgaw teko nànàñ ihe nehe no, wazemono'og mehe ihe nehe no, i'i izupe.

13 Nezewe i'i Zezuz purupe. — Azeruzar katu Tupàn rehe ihe. Uzapo putar ikatu ma'e ihewe nehe, i'i wanupe. Amo ae ma'e umume'u wanupe no. — Aiko xe hepurumuzàmuzàg zàwenugar wapyr ihe, ta'e Tupàn umur ihewe a'e wà xe, i'i wanupe.

14 Ipurumuzàmuzàg zàwenugar a'e wà, teko romo wanekon a'e wà. Ho'o wà, huwy wà no. A'e rupi Zezuz a'e no, wiko wazàwe a'e no, awa romo wiko pà a'e no. A'e rupi upuner ikàgaw iz'o'kaw rehe, àzàg wanuwihiaw wi a'e, tekwe ikatu 'ym ma'e wanuwihiaw wi a'e. Wanuwihiaw a'e, zanemulkyze har zanemàno haw wi a'e. 15 Teko ukyze katu umàno àwàm wi a'e wà. A'e rupi zemunehew paw pe har ài

wanekon wà. Zezuz umuhem kar teko a'e zemunehew paw wi a'e wà. Nukyze kwaw umànò haw wi wà kury. **16** Ko heze'eg azeharomoete ihe. Nur kwaw Zezuz weko haw pe har wapytywà pà a'e. Nan. Nezewe i'i ze'eg imuapyk pyrer a'e. — Zezuz upytywa Àmàràaw izuapypyr iko a'e wà, i'i a'e ze'eg. **17** A'e rupi Zezuz a'e, wywyr wazàwegatete hekon a'e. A'e rupi Xaxeto wanuwhiaw ài hekon wanupe a'e, ma'e iapo pà Tupàn huwa rupi wanekuzaromo a'e. Nupytu'u kwaw ma'e iapo re Tupàn huwa rupi, uzehe uzeruzar ma'e wanekuzaromo. Upuhareko katu teko a'e wà, a'e rupi uze'eg nezewe Tupàn pe tuweharupi a'e. — Ezepyk zo wanehe nehe, ta'e amànò wanekuzaromo ihe xe, wanemiapo kwer ikatu 'ym ma'e imunàn pà ihe xe, i'i iko izupe. Nezewe mehe Tupàn umunàn wanemiapo kwer wanuwi. Heharaz a'e ikatu 'ym ma'e wi. **18** Ywy rehe heko mehe Zurupari uzeagaw zepe ikatu 'ym ma'e iapo kar pà Zezuz pe a'e. Upuraraw Zezuz ma'erahy a'e no. Nuzapo kwaw ikatu 'ym ma'e. A'e rupi ko 'ar rehe upuner teko wapytywà haw rehe nehe kury, aze Zurupari ipurapo kar wer ikatu 'ym ma'e rehe wanupe nehe.

***Uze'eg Zezuz rehe a'e kury,
Moizez rehe a'e no***

3 **1** Pe herywyr Zaneruhawete rehe uzeruzar ma'e pe. Tupàn penenoz a'e, wemiruze'eg romo pemuiigo kar pà a'e. Pema'enukwaw Zezuz rehe nehe. Tupàn umur kar Zezuz ywy rehe, wàpuzuhu rehe uzekaiw ma'e wanuwhiaw romo imuigo kar pà. Zazeruzar Tupàn rehe. Zezuz wiko xaxeto ài zanewe. Uze'eg iko u pe zanerekuzaromo, xaxeto ài. **2** Kwehe mehe Tupàn uze'eg Zezuz pe a'e. — Ezekaiw katu heremiruze'eg wanehe nehe, i'i izupe, wemiruze'eg wanuwhiawete romo imuigo kar pà. Zezuz a'e, weruzar tuwe ize'eg a'e, wanehe uzekaiw katu pà a'e. Nezewegatete Moizez a'e no, weruzar katu Tupàn ze'eg a'e no, hemiruze'eg wanehe uzekaiw katu pà a'e no. **3** Aze awa

uzapo tåpuz ikatuahy ma'e a'e nehe, teko uze'egatu putar iapo har rehe a'e wà nehe. Nuze'egatu tete'u kwaw tåpuz rehe wà nehe, ta'e tåpuz nuzeapo kwaw a'e xe. Uze'egatu putar iapo har rehe wà nehe, ta'e a'e ac uzapo a'e tåpuz a'e xe. Nezewegatete zaze'egatu Zezuz rehe nehe, ta'e tuwhiwete romo hekon a'e xe. Moizez a'e, hemiruze'eg romo hekon a'e. A'e rupi Zezuz ikàg wera'u Moizez wi a'e. A'e rupi, tuwe zaze'egatu wera'u Zezuz rehe zane nehe. **4** Aze heta tåpuz nehe, heta iapo arer nehe no. Tupàn a'e, ma'e paw iapo har romo hekon a'e. **5** Moizez weruzar Tupàn ze'eg. Uzekaïw katu hemiruze'eg wanehe. Tuweharupi uma'ereko iko Tupàn pe. Umume'u ize'eg oho iko purupe no.

6 Zaneruhawete a'e, Tupàn ta'y romo hekon a'e. Tupàn hemiruze'eg wanuwhiawete romo hekon a'e. Awa uzekaïw katu uzar hâpuz a'e. Nezewegatete Zezuz uzekaïw katu zanerehe a'e, ta'e zaiko tu hâpuz ài zane xe. Aze zanekàg nehe, zaiko wiwi putar hemiruze'eg romo nehe. Aze nazapytu'u kwaw ipyr zaneho àwàm rehe zanezeruzar ire nehe, zaiko wiwi putar hemiruze'eg romo nehe, zaiko wiwi putar Tupàn hâpuz zàwenugar romo nehe.

***Tupàn hemiruze'eg upytu'u
putar a'e wà nehe***

7 Nezewe i'i Tekwe Puràg purupe a'e.

Aze peinu Tupàn ze'eg kutàri nehe, **8** peiko zo hehe uzeruzar 'ym ma'e romo nehe. Peiko zo penàmuz wazàwe nehe.

Kwehe mehe nuweruzar kwaw

Tupàn ze'eg a'e wà, tåpuz heta 'ymaw rehe ywyxig heta haw rehe wata mehe a'e wà.

Wagaw Tupàn a'e wà. — Aze naxiruzar kwaw ize'eg nehe, nuzepyk kwaw zanerehe nehe, i'i zepe uzeupeupe wà.

9 — A'e mehe penàmuz heragaw a'e wà, i'i Tupàn. — Amumaw 40 kwarahy ihe, xo ikatuahy ma'e iapo pà wanupe ihe.

Wexak heremiapo kwer ikatu ma'e a'e wà. Nuweruzar kwaw heze'eg wà.

10 A'e rupi aikwahy wanupe ihe.
Aze'eg wanupe.

— Naperuzar pixik kwaw heze'eg, napeiko kwaw heremiruze'eg ikatu ma'e romo, a'e wanupe.

11 Aikwahy wanupe. A'e rupi amume'u tuwe heze'eg wanupe.

— Azapokatu amo ywy kwez peme ihe, peneko àwàm romo ihe.

Napeiko pixik kwaw a'e ywy rehe nehe. Napepytu'u pixik kwaw a'e pe nehe, a'e wanupe, i'i a'e. Uze'eg heruzar 'ymar wanupe. **19** A'e rupi nupuner kwaw weko haw rehe a'e ywy rehe wà, ta'e nuzeruzar kwaw hehe wà xe.

12 Herywyr wà. Peme'egatu nehe, ikatu 'ym ma'e wi petyryk pà nehe. Tuwe ni amo pepyr har nuwereko kwaw ikatu 'ymaw upy'a pe wà nehe. Tuwe ni amo nuiko wi kwaw uzeruzar 'ym ma'e romo wà nehe. Tuwe nupuir kwaw Tupàn wikuwe ma'e wi wà nehe. **13** Aze amo uzapo ikatu 'ym ma'e iko nehe, hehàpyhà 'ym ma'e ài hekon putar nehe. Nuexak kwaw Tupàn ikatu haw. A'e rupi nuweruzar kwaw izel'eg. Pezepytywàtuweharupi nehe. A'e mehe napeiko kwaw uzeruzar 'ym ma'e romo nehe. Aze peinu Tupàn ze'eg kutàri nehe, peikuwe zo hehe uzeruzar 'ym ma'e romo nehe, i'i a'e ze'eg kwehe arer. A'e ze'eg a'e, uze'eg zanewe ko 'ar rehe a'e. **14** Izypy mehe zazeruzar tuwe Zaneruhawete rehe zane. Aze zazeruzar zaha zaiko hehe zane nehe, te iahykaw rehe nehe, zaiko putar ipyr tuweharupi nehe. Xiriko putar ikatu haw ikàgaw nehe no. **15** Nezewe i'i a'e ze'eg imuapyk pyrer a'e.

— Aze peinu Tupàn ze'eg kutàri nehe, peikuwe zo hehe uzeruzar 'ym ma'e romo nehe.

16 Moizez weraha teko Ezit ywy wi a'e wà. Tupàn omono uze'eg wanupe a'e. Nuweruzar kwaw izel'eg wà. Naheko wer kwaw hemiruze'eg romo wà. **17** Tupàn umumaw 40 kwarahy a'e kury, wanupe wikwahy pà a'e kury. Ta'e uzapo ikatu 'ym ma'e a'e wà xe. Umàno a'e pe wà, wwyxig heta haw pe wà.

18 — Napeiko pixik kwaw a'e ywy rehe nehe, heremiapo katu kwer rehe nehe, i'i Tupàn wanupe. — Napepytu'u pixik kwaw a'e pe nehe, a'e wanupe, i'i a'e. Uze'eg heruzar 'ymar wanupe. **19** A'e rupi nupuner kwaw weko haw rehe a'e ywy rehe wà, ta'e nuzeruzar kwaw hehe wà xe.

4 **1** Ko 'ar rehe kury, Tupàn umume'u uzepyr zaneixe àwàm kwez zanewe a'e. Zappyta putar zaha ipyr zane nehe. Tuwe zazeruzar wi wi hehe nehe. Tuwe nazapytu'u kwaw heruzar ire nehe. A'e rupi zaha putar tuwe ipyr nehe. Zanepytwà putar ko 'ar rehe nehe no. Aze amo teko upytu'u izel'eg heruzar ire wà nehe, Tupàn nupytywà kwaw a'e teko a'e wà nehe. A'e teko noho kwaw ipyr wà nehe. **2** Ta'e xinu ze'eg puràg kwez zane xe. Teko kwehe arer wenu a'e ze'eg a'e wà no. Noho kwaw a'e ywy rehe wà, Tupàn hemiapo katu kwer rehe wà. Ta'e nuzeruzar kwaw a'e ze'eg rehe henu mehe wà xe. **3** Zazeruzar Tupàn rehe zane. A'e rupi zaixe putar heko haw pe nehe, zanepytwà pà ipyr tuweharupi nehe. Nezewe i'i zaneipy wanupe a'e.

— Aikwahy wanupe ihe. A'e rupi amume'u tuwe heze'eg wanupe.

— Azapokatu amo ywy kwez peme ihe, peneko àwàm peme ihe.
Napeiko pixik kwaw a'e ywy rehe nehe.
Napepytu'u pixik kwaw a'e pe nehe,
a'e wanupe,
i'i Tupàn wanupe.

Nezewe uze'eg tuwe a'e. Ywy iapo paw ire umumaw Tupàn uma'erekò haw.

4 Nezewe i'i amo ze'eg kwehe arer pape rehe imuapyk pyrer. — **6** 'ar pawire, **7** haw 'ar mehe Tupàn upytu'u a'e, uma'erekò haw iapo pawire a'e. **5** Amo ae ze'eg kwehe arer uze'eg mytu'u haw rehe a'e. — Nur pixik kwaw hepyr upytu'u pà a'e wà nehe, i'i Tupàn uze'eg heruzar 'ymar wanupe. **6** Tupàn ze'eg puràg henu arer izypy mehe arer a'e wà, nuixe kwaw ipyr upytu'u pà a'e wà, ta'e nuzeruzar kwaw hehe a'e wà xe. Amo ae teko oho putar ipyr a'e wà nehe, upytu'u pà a'e pe a'e wà nehe. **7** — Peruzar

heze'eg kutàri nehe, i'i Tupàn Moizez hemiruze'eg wanupe, wyxig heta haw rehe waneko mehe. Nuweruzar kwaw wà. A'e rupi umumaw kwarahy tetea'u a'e pe wiko pà wà. Tupàn wexak amo ae 'ar a'e. Wexak amo ae teko a'e wà no. Umuigo kar a'e teko wemiruze'eg romo a'e wà. — Pe nehe kury, hereruzar pe nehe kury, i'i tuwihaw Tawi pe. Tawi umume'u a'e Tupàn ze'eg a'e, wemiruze'eg wanupe a'e, ta'e Tupàn umume'u kar izupe a'e xe. Nezewe i'i a'e Tawi ze'eg kwehe arer a'e. — Peinu Tupàn ze'eg kwez kutàri. Peikuwe zo hehe uzeruzar 'ym ma'e romo nehe, i'i a'e.⁸ A'e wyxig heta haw rehe har a'e wà, a'e uzeruzar 'ym ma'e a'e wà, nuiko kwaw a'e wyv katu ma'e rehe a'e wà. Umàno ywy ikatu 'ym ma'e rehe wà. Xo wazuapyapry zo wiko oho hehe wà. Tuwihaw Zuzue weraha a'e teko ywy katu ma'e rehe a'e wà. Aze mo tuwihaw Zuzue weraha a'e teko Tupàn pyr a'e wà, wapytu'u hawete pe mo a'e wà, a'e mehe mo Tupàn nuzel'eg wi iwer mo hehe amo ae 'ar mehe a'e.⁹ Mokoz ma'e rehe Tupàn uze'eg a'e. Zutew kwehe arer wiko oho a'e wyv katu ma'e rehe a'e wà, upytu'u pà a'e wà. Zezuz rehe uzeruzar ma'e upytu'u putar oho Tupàn heko haw pe a'e wà nehe no. Mokoz pytu'u haw rehe uze'eg a'e. Tupàn upytu'u ywy iapo re a'e. Nezewegatete zapytu'u putar ko ywy rehe zanerekoko re zane nehe no, ipyr zanerekoko mehe zane nehe no.¹⁰ Ta'e Tupàn pyr upytu'u ma'e ràm a'e wà nehe xe, upytu'u putar uma'erekoko haw iapo re a'e wà nehe xe. Wapytu'u àwàm nuzawy kwaw Tupàn ipytu'u awer.¹¹ A'e rupi xiruzar tuwe ize'eg nehe. A'e rupi zaixe putar ipyr zapytu'u pà nehe. Tuwe ni amo zanepyr har nuzewyr kwaw izuwi wà nehe. Xiruzar ize'eg paw rupi katete zane nehe. Tuwe zaixe ipyr zane paw rupi nehe no.

12 Tupàn ze'eg a'e, nuzawy kwaw ma'e wikuwe ma'e a'e. Uzapò ma'e iko tuweharupi teko wapy'a pe. Nuzawy kwaw takihe haimezuazar ma'e a'e. Nuzawy kwaw takihe haime katu ma'e. Aze ximonohok ma'ero'o kwer takihe pupe, xixak te ikagwer, te iputu'ugwer no. Nezewegatete

Tupàn ze'eg uze'egatu tuwe zanepy'a pe a'e no. — Azeharomoete aiko ikatu 'ym ma'e iapo har romo ihe, za'e imugeta mehe. — Azeharomoete heremiaipo kwer na'ikatu kwaw Tupàn pe, za'e imugeta mehe. Zazemumikahy imugeta mehe.¹³ Teko nupuner kwaw ni pitai ma'e imimaw rehe Tupàn wi a'e wà. Wexak ma'e paw rupi katete a'e. Ukwaw zaneremiapo kwer paw rupi katete no. A'e rupi peiko zo zaneipy wazàwe nehe. Nuweruzar kwaw Tupàn ze'eg wà. Peruzar katu iz'e'eg nehe. A'e rupi peixe putar ipyr nehe, pepytu'u pà nehe.

Zezuz a'e, Xaxeto wanuwihaw ikàg wera'u ma'e romo hekon a'e

14 Tuweharupi ximume'u Zezuz rehe zaneruzar haw purupe zane. Pepytu'u zo hehe pezeruzar ire nehe. Pepytu'u zo heruzar ire nehe no. Ta'e Zezuz Tupàn ta'yr a'e xe, wiko Xaxeto wanuwihaw ài zanewe a'e xe. Uzekaïw katu zanerehe, xaxet ài. Wixe Tupàn huwa rupi, zanerekuzaromo. Uze'eg izupe zanerekuzaromo no.¹⁵ Nuiko kwaw zanepuhareko 'ymar romo. Zanerekoko katu a'e. Zanepuhareko katu a'e, ta'e nazanekàg kwaw zane xe. Wyv rehe heko mehe Zurupari ipurapo wer ikatu 'ym ma'e rehe izupe a'e. Nuzapo pixik kwaw ikatu 'ym ma'e a'e.¹⁶ Tuwe zanekàg nehe. Pekyze zo nehe. Peze'eg Tupàn pe nehe, ta'e zanepuhareko katu a'e xe. Aze zawaiw katu zanerekoko haw zanewe nehe, zanepuhareko katu Tupàn a'e nehe, zanepetywà putar a'e nehe no.

5 **1** Zutew wexaexak pitai awa a'e wà, Xaxeto wanuwihaw romo imuigo kar pà a'e wà. A'e tuwihaw a'e, uze'eg Tupàn pe teko wanekuzaromo a'e. Omono ma'e izupe no. Uzuka ma'ea'yr huwa rupi, teko wanemiaipo kwer ikatu 'ym ma'e hekuzaromo.² A'e tuwihaw a'e, awa romo hekon a'e. A'e rupi aze amogwer teko nukwaw katu kwaw ma'e a'e wà, aze uzawy Tupàn hape a'e wà, a'e tuwihaw nuzel'eg ahayah kwaw wanupe a'e.³ A'e tuwihaw na'ikàg kwaw a'e no, a'e rupi nupuner kwaw

ma'ea'yir izuka haw rehe teko wanemapiro kwer ikatu 'ygwer hekuzaromo zutyka'i a'e, te wemiapo kwer hekuzaromo uzuka a'e no.

4 — Aiko Xaxeto wanuwhaw romo ihe, ni'i kwaw wyzài awa a'e. Tupàn wexaexak amo awa a'e. Xo a'e awa zo wiko wanuwhaw romo. Nezewe Tupàn wexak Àràw kwehe mehe, wanuwhaw romo imuigo kar pà.

5 Nezewegatete Zezuz a'e no. — Xaxeto wanuwhaw romo aiko ihe, ni'i kwaw a'e. Tupàn uze'eg izupe a'e.

— Ereiko hera'yir romo ne.

Kutàri aiko neru romo ihe,
i'i izupe.

6 Amo 'ar mehe uze'eg nezewe izupe.

— Ereiko putar heràpuz rehe uzekaiw ma'e romo tuweharupi nehe.

Nerepytu'u pixik kwaw hehe uzekaiw ma'e romo nerekö re nehe.

Mekizetek haikwerupi har romo
ereiko putar nehe, i'i izupe.
(Mekizetek a'e, Xaxeto kwehe
arer romo hekon a'e.)

7 Ko ywy rehe wiko mehe uze'eg Zezuz Tupàn pe tuweharupi a'e. — Hepatywà pe nehe, i'i izupe tuweharupi. Uzai'o izupe uze'eg mehe no. Tupàn upuner mo imàno haw wi ipyro haw rehe a'e. Nupyro kwaw. Zezuz uezapo ikàg 'ym ma'e romo. Weruzar Tupàn ze'eg iko tuweharupi, hemapiro putar haw iapo pà. A'e rupi Tupàn wenu ize'eg mehe. **8** Tupàn ta'yir romo hekon. Tu nupyro kwaw wa'yir ma'erahy wi. Upuraraw ma'erahy tetea'u. Nezewe uzemu'e u ze'eg heruzar haw rehe. **9** Upuraraw ma'erahy tetea'u. — Uhyk kury, i'i tu izupe. A'e mehe upuner umàno haw rehe, teko wapyro pà tatahu wi. Upyro putar uze'eg heruzar har paw rupi katete wà nehe. Upyta putar ipyr tuweharupi wà nehe. **10** — Uhyk kury, i'i tu izupe. — Ereiko heràpuz rehe uzekaiw ma'e ikàg wera'u ma'e romo ne kury, Mekizetek haikwerupi har romo kury, i'i izupe.

— *Napekwaw katu kwaw ikatu 'ygwer wi petyrykaw, i'i wanupe*

11 Heta tetea'u ma'e peme ureremimume'u ràm ure. Zezuz zanerekuzaromo ima'erekò haw rehe ze'egaw urumume'u putar peme nehe. Peme imume'u haw zawaiw katu urewe a'e, ta'e mewe katu pezemü'e agwer ma'e rehe pe xe.

12 Kwehe peiko uzeruzar ma'e romo. Pepuner mo upurumu'e ma'e romo peneko haw rehe. Napeiko kwaw. Mâràzawé tuwen aipo pa. Napekwaw kwaw Tupàn ze'eg zawaiw 'ym ma'e. Amono kar tari purumu'e ma'e pepyr ihe. **13** Kwarera'i u'u uhy ikamy kwer a'e, ta'e nupuner kwaw temi'ueti i'u haw rehe a'e xe. Temi'ueti i'u 'ymar a'e, kwarera'i romo hekon a'e. Pe no, peiko kwarera'i ài pe no. Kwarera'i nu'u kwaw temi'ueti a'e wà. Nezewegatete napezemu'e katu kwaw Tupàn ze'eg rehe. A'e rupi napekwaw kwaw ikatu 'ym ma'e wi petyrykaw. Napekwaw kwaw Tupàn hemapiro putar haw iapo haw. **14** Awa tua'u ma'e a'e wà, kuzà ihya'u ma'e a'e wà no, u'u temi'ueti a'e wà. Nezewegatete uzeruzar ma'e ikàg ma'e a'e wà no, uzemu'e katu Tupàn ze'eg rehe a'e wà no. Ukwaw katu hemapiro putar haw iapo haw wà. Ukwaw ikatu 'ym ma'e wi utyrykaw rehe wà no. Uptytu'u tuwe iapo re wà.

6 **1** A'e rupi pezemü'e katu Tupàn ze'eg rehe nehe. Peiko awa itua'u ma'e ài nehe, kuzà ihya'u ma'e ài nehe. Izypy mehe pezemü'e Zaneruwhawete rehe ze'eg zawaiw 'ym ma'e rehe. Pekwaw katu a'e ze'eg kury. Pezemü'e ze'eg zawaiw katu wera'u ma'e rehe nehe kury. Pezzapo e ma'e peiko kury. Tupàn nuzapo kar kwaw a'e ma'e iko ko 'ar rehe a'e kury. Izypy mehe — Pezeruzar Tupàn rehe nehe, uru'e peme. Pezeruzar peiko hehe kury. Nuru'e wi kwaw peme nehe kury. **2** — Pezemuzahazahak kar nehe, uru'e peme. Pezemuzahazahak kar, ureze'eg heruzar pà. Nuru'e wi kwaw peme nehe kury. — Pepokok uzeruzar ma'e wanehe nehe, a'e rupi xo Tupàn zo weruzar putar a'e wà nehe, uru'e peme. Peruzar ureze'eg peiko kury. Nurumume'u wi kwaw peme nehe kury. — Amo 'ar mehe

umàno ma'e kwer ukweraw wi putar a'e wà nehe. Ikatu 'ym ma'e iapo arer ukweraw ma'e kwer oho putar tatahu pe wà nehe. Uzeruzar ma'e ukweraw ma'e kwer oho putar Tupàn pyr wà nehe, uru'e ure. Pekwaw katu a'e ma'e kury. Nurumume'u wi kwaw peme nehe kury. **3** Tuwe zazemu'e Tupàn ze'eg zawaiw katu ma'e rehe zane nehe kury. Aze Tupàn uputar nezewe haw nehe, zazemu'e putar iz'e'eg rehe nehe.

4 Aze amo upuir tuwe Tupàn wi a'e wà nehe, nazapuner kwaw wamuzewyr kar haw rehe izupe zane wà nehe. Ukwaw Tupàn a'e wà, ukwaw iz'e'eg a'e wà no. Tatainy ài hekon Tupàn a'e. A'e teko ukwaw Zezuz ikatu haw a'e wà no. Tupàn ywak rehe har umur Zezuz wanupe a'e. Úmur Wekwe Puràg wanupe no. **5** Ukwaw tuwe Tupàn ze'eg ikatu haw wà. Amo 'ar mehe Zezuz upureruze'eg putar ko ywy rehe a'e nehe, ukàgaw hexak kar pà purupe a'e nehe. Ywy rehe wiko mehe uzapo purumupyuhagatu kar haw no. A'e teko wexak ikàgaw a'e wà. **6** Ko 'ar rehe a'e teko upytu'u hehe uzeruzar ire wà kury. Nazapuner kwaw wamuzewyr kar haw rehe Tupàn pe, ta'e tuweharupi Tupàn ta'y ywyra kanetar rehe izuka wi wi har ài wanekon a'e wà xe. Ta'e hehe uze'eg uryw ahyahy ma'e romo wanekon tuweharupi a'e wà no xe.

7 Aze àmàn ukyr ywy rehe nehe, ma'e itym pyrer hezuz putar nehe. Itym arer hurywete putar nehe. **8** Aze xu itua'u nehe, aze heta tetea'u ka'akyry nehe, upyk putar ma'e itym pyrer nehe. Na'ikatu kwaw itym arer pe nehe. Nezewegatete, aze uzeruzar ma'e oho tuwe waiko Tupàn hape rupi wà nehe, upytu'u 'ym pà wà nehe, a'e mehe Tupàn hurywete putar nehe. Aze upytu'u uzeruzar ire wà nehe, na'ikatu kwaw Tupàn pe wà nehe. A'e ko zar umunyk putar tata xu rehe nehe. Nezewegatete Tupàn omono kar putar uzeruzar 'ym ma'e tatahu pe wà nehe. **9** Hemyrypar wà. Aze'eg ahyahy nezewe peme ihe, ta'e apuamutar katu ihe xe. Napepytu'u kwaw pezeruzar ire. Pezeruzar wi wi tuweharupi nehe, pepytu'u 'ym pà nehe. Tupàn uzapo putar ikatuahy ma'e peme a'e

nehe, ta'e pepyro putar a'e nehe xe, ta'e napepytu'u kwaw hehe pezeruzar ire nehe xe. **10** Pema'erekò katu peiko Tupàn pe. Naheharaz kwaw pema'erekò haw wi nehe. Pezamutar katu Tupàn. A'e rupi pepetywàgatu amogwer uzeruzar ma'e peiko pe wà. Naheharaz kwaw pema'erekò haw wi nehe.

11 Xo ko ma'e uruputar ure. Peàro Zezuz izewyr àwàm peiko. Hàro mehe pe pitaitàigatu pezamutar wi wi Tupàn nehe. Pepetywàgatu wi wi hemiruze'eg pe wà nehe no. A'e rupi tur mehe uzapo putar ikatuahy ma'e peme nehe no. **12** Peiko zo iranahy ma'e romo nehe. Peiko uzeruzar katu ma'e wazàwe nehe. Zezuz rehe uzeruzar haw rehe ma'erahy ipurawar mehe wà, nypytu'u kwaw uzeruzar ire wà. A'e rupi Tupàn uzapo putar a'e ikatuahy ma'e imume'u pyrer a'e nehe, a'e uzeruzar katu ma'e wanupe a'e nehe. Aze peiko wazàwe nehe, uzapo putar wemimume'u kwer peme nehe no.

Tupàn uzapo tuwe wemimume'u kwer a'e nehe

13 Kwehe mehe Tupàn umume'u tuwe ma'e wemiapo ràm Àmàrààw pe a'e. — Azeharomoete azapo putar heremimume'u kwer ihe nehe, i'i izupe. Umume'u tuwe a'e ma'e uwer rehe a'e, ta'e naheta kwaw izuwi ikàg wera'u ma'e a'e xe. **14** Nezewe uze'eg izupe. — Azapo e putar ikatuahy ma'e newe ihe nehe, i'i izupe. — Amono putarhekàgaw newe nehe. A'e rupi erepurumùzàmùzàg tetea'u putar nehe. Nezuapyapry heta tetea'u putar a'e wà nehe, i'i izupe. **15** Wàrogatu Àmàrààw a'e ma'e Tupàn hemimume'u kwer a'e. A'e rupi Tupàn umur izupe. **16** Aze awa umume'u tuwe wemiapo ràm a'e nehe, ima'enukwaw amo ikàg wera'u ma'e rehe a'e nehe. Umume'u tuwe a'e wemiapo ràm a'e ikàg ma'e her rehe a'e. Aze awa umume'u tuwe wemiapo ràm Tupàn her rehe nehe, amogwer uzeruzar putar iz'e'eg rehe a'e wà nehe. — Kwa, nerezapo kwaw nehe, ni'i kwaw amo izupe wà nehe. **17** Tupàn umume'u wemiapo ràm Àmàrààw pe a'e. — Azapo

putar tuwe heremimume'u kwer ihe nehe, i'i izupe. Nazuhaw pixik kwaw ko heze'eg ihe nehe, i'i izupe. Ipurukwaw kar wer wemiapo ràm rehe purupe, a'e rupi umume'u tuwe a'e ma'e uwer rehe. (Ta'e ni amo na'ikàg wera'u kwaw Tupàn wi a'e wà xe.)

18 Umume'u tuwe a'e. Umume'u uwer rehe. A'e rupi nuzuhaw kwaw nehe. Uzapo putar tuwe nehe. A'e rupi zane tatahu wi ipyro pyrer zane kury, zanerurywete zane kury. Zanekàg tuwe no, ta'e xiàro tuwe hemiapo ràm zane xe, ta'e umume'u tuwe purupe kwehe mehe a'e xe. Zanepyro tuwe tatahu wi. Zaha putar tuwe ipyr nehe. **19** Xiàpixi ita ipuhuz katu ma'e kyàhàm pupe zane, kanu rehe zane. Aze zanepurumupyta kar wer kanu rehe ryahu mytepe, xityk a'e ita 'y pupe. A'e rupi ywytu nueraha kwaw kanu a'e. Nezewegatete Zurupari nazanemunyryk kar kwaw Tupàn wi a'e, ta'e xiàrogatu tuwe Tupàn pyr zaneho àwàm zane xe, ta'e xikwaw tatahu wi zanepyro haw zane xe. Azeharomoete zaha putar ipyr nehe. Xaxeto wanuwhaw a'e, tuweharupi wixe Tupàn pe ze'egaw pupe a'e, pàn rupi a'e. Amogwer nuixe kwaw a'e pe wà. A'e awa oho uze'eg pà Tupàn pe, hemiruze'eg wanekuzaromo. Nezewegatete ywak rehe Zezuz oho Tupàn huwake a'e. Uze'eg iko zanerekuzaromo kury. **20** Oho Zezuz u huwake a'e, zanerenataromo a'e. Xaxeto wanuwhaw ikàg wera'u ma'e romo hekon kury, wiko putar tuwhaw romo tuweharupi nehe no. Mekizetek haikwerupi har romo hekon.

Mekizetek a'e, tuwhaw romo hekón kwehe mehe a'e

7 ¹Kwehe mehe Mekizetek a'e, Xarez tawhu pe har wanuwhaw romo hekon a'e. Uze'eg Tupàn Ikàg Wera'u Ma'e pe tuweharupi, teko wanekuzaromo, uzuka ma'e'a'yri wanemiapo kwer ikatu 'ym ma'e hekuzaromo. Amo 'ar mehe Àmàràw uzàmàtyry'ym amo ae tuwhaw oho a'e wà. Àmàràw hemiaihu uzuka a'e tuwhaw wanemaihu tetea'u a'e wà. Uzuka a'e tuwhaw wà no. Upyhyk wama'e

wanemetarer wà no. Na'e Àmàràw uzewyr Xarez tawhu kutyr wà kury. Mekizetek uwàxi Àmàràw oho pe rupi. Uze'eg izupe. — Tuwe Tupàn uzapo ikatu ma'e newe a'e nehe, i'i izupe. **2** Na'e Àmàràw umur uma'e kurer izupe kury, a'e ma'e zauxiapkekwer wanuwi iphyk pyrer ikurer a'e kury. Aze 10 temetarer wereko, omono pitài Mekizetek pe. Mekizetek her, — Heruwihaw ikatuahy, i'i zaneze'eg rupi. Xarez tawhu her, — Zeàmàtyry'ym 'ymaw wanuwhaw, i'i zaneze'eg rupi. Mekizetek a'e, Xarez tawhu pe har wanuwhaw romo hekon a'e mehe a'e. A'e rupi uzeàmàtyry'ym 'ym ma'e wanuwhaw romo hekon a'e. **3** Ni amo numume'u kwaw Mekizetek tu her a'e wà, ni ihy her a'e wà, ni hàmuzgwer waner a'e wà no. Numume'u kwaw izexak kar awer wà. Numume'u kwaw imàno awer wà no. Tupàn ta'yà ài hekon. Xaxeto romo hekon tuweharupi nehe no.

4 Azeharomoete ikàg a'e. Àmàràw a'e, zaneràmuz ikàg wera'u ma'e a'e, omono wemetarer ikurer izupe a'e, Mekizetek pe a'e. (Upyro a'e ma'e a'e temetarer zauxiapkekwer wanuwi, wàmàtyry'ym ire.)

5 Erewi izuapyapyr a'e wà, Xaxeto a'e wà, omono'og Izaew izuapyapyr wanemetarer ikurer a'e wà, ta'e ze'eg kwehe arer omono'og kar nezewe wanupe a'e xe. Wànàm umur wemetarer ikurer wanupe wà. Àmàràw izuapyapyr romo wanekon paw rupi katete wà. **6** Mekizetek a'e, nuiko kwaw Erewi izuapyapyr romo a'e. Upyhyk hemetarer ikurer Àmàràw wi, upyhyk ima'e kurer izuwi no. — Tuwe Tupàn uzapo ikatuahy ma'e newe nehe, i'i izupe, ta'e Tupàn umume'u ikatu ma'e wemimono ràm Àmàràw pe a'e xe. **7** Tupàn hemiapo ràm imume'u har a'e, ikàg wera'u uze'eg henu har wi azeharomoete a'e. **8** Amogwer xaxeto a'e wà, Tupàn pe temetarer imono'ogar a'e wà, umàno putar a'e wà nehe. Mekizetek a'e, temetarer imono'ogar a'e, wikuwe a'e. Ze'eg imuapk pyrer umume'u hekuwe haw zanewe. **9** Àmàràw omono uma'e ikurer izupe a'e. (Erewi nuzexak kar kwaw a'e 'ar

mehe a'e rihi. A'e rupi wine Àmàrààw hetekwer pupe a'e rihi.) A'e rupi — Erewi a'e no, omono uma'e kurer izupe a'e no, za'e izupe. Ta'e tàmuz Àmàrààw omono izupe xe. **10** Erewi nuzexak kar kwaw a'e 'ar mehe a'e rihi. Wine wàmuz hetekwer pupe rihi. Tàmuz wexak Mekizetek a'e, Erewi izexak kar 'ym mehe a'e rihi.

11 Tupàn omono uze'eg kwehe arer Izaew izuapyapyr wanupe a'e. Umuigo kar Erewi izuapyapyr wàpuz rehe uzekaiw ma'e romo a'e wà, Izaew izuapyapyr wapytywà har romo a'e wà. Aze mo Erewi izuapyapyr wama'erekò awer ikatuahy Tupàn pe, a'e mehe mo nuzexak kar iwer mo amo ae xaxeto zanewe. Nuhyk kwaw wama'erekò haw Tupàn pe. A'e rupi uzexak kar amo ae xaxeto a'e. Mekizetek haikweromo har romo hekon a'e. Nuiko kwaw Àràw haikweromo har romo. (Nuiko kwaw Erewi hemimino romo.) **12** Tupàn umur amo ae tàpuz rehe uzekaiw ma'e kwez zanewe a'e kury. A'e rupi umur kar amo ae ze'eg kwez zanewe no. **13** Zanezar Zezuz a'e, amo ae awa hemimino romo hekon a'e. Nuiko kwaw Erewi hemimino romo. **14** Zuta hemimino romo hekon a'e. Zuta izuapyr nuiko kwaw xaxeto romo a'e wà. Kwehe mehe Moizez uze'eg Erewi izuapyapyr wanupe a'e. — Peiko Xaxeto romo nehe, i'i wanupe. Nuze'eg pixik kwaw nezewe Zuta izuapyapyr wanupe.

— Ereiko Mekizetek haikwerupi har romo, i'i Tupàn Zezuz pe a'e kury

15 Pekwaw wera'u putar heze'eg nehe kury. Amo ae xaxeto uzexak kar wà zanewe ko 'ar rehe kury. Mekizetek haikwerupi har romo hekon a'e. (Zezuz her romo a'e.) **16** — Ereiko xaxeto romo ne, ni'i kwaw amo izupe wà. Teko nuzapo kar kwaw ma'e izupe wà. Wikuwe putar tuweharupi nehe. A'e rupi nupytu'u pixik kwaw xaxeto romo wiko re nehe. **17** Nezewe i'i Tupàn ze'eg pape rehe imuapyl pyrer a'e.

— Ereiko putar xaxeto romo tuweharupi nehe, nepytu'u 'ym pà nehe.

Mekizetek haikwerupi har romo ereiko. Izàwenugar romo ereiko.

18 Ze'eg kwehe arer a'e, nuzawy kwaw takihe haime 'ym ma'e a'e. Teko nomonohok kwaw ma'e takihe haime 'ym ma'e pupe wà. Nezewegatete ze'eg kwehe arer numukàg kwaw Tupàn hemiaihu wà. Aze umugeta nupytu'u kwaw ikatu 'ym ma'e iapo re wà. A'e rupi Tupàn uze'eg nezewe zanewe kury. — Peho zo a'e ze'eg kwehe arer rupi nehe kury, i'i zanewe kury. **19** Ta'e ze'eg kwehe arer Moizez pe imur pyrer a'e xe, numukatu kwaw teko a'e wà xe. Numuawyse kar pixik kwaw teko Tupàn pe wà. A'e rupi Tupàn umume'u ze'eg ipyahu ma'e kury. Xiàro zanemuawyse haw Tupàn pe zane kury, ta'e zaha zaiko ize'eg ipyahu ma'e rupi zane kury xe.

20 — Ereiko putar heràpuz rehe uzekaiw ma'e romo tuweharupi nehe, nerepytu'u kwaw teko wapytywà re nehe, i'i Tupàn a'e, Zaneruwhawete pe a'e. Nuze'eg pixik kwaw nezewe amogwer xaxeto wanupe. **21** Tupàn umume'u a'e ma'e izupe. A'e rupi Zaneruwhawete wiko tuwe xaxeto romo a'e, purupytywà har romo a'e. Nezewe i'i ze'eg kwehe arer.

— Zanezar Tupàn umume'u tuwe ma'e kwez Zaneruwhawete pe a'e. Numuzewyr pixik kwaw uze'eg awer nehe.

Ereiko putar xaxeto romo nehe, ereiko putar purupytywà har romo tuweharupi nehe, nepytu'u 'ym pà nehe, i'i Zaneruwhawete pe.

22 Tupàn ze'eg ipyahu ma'e ikatu wera'u ize'eg kwehe arer wi a'e. Tupàn umume'u a'e ze'eg kwehe arer Moizez pe. Na'e Moizez umume'u teko wanupe. Ikatu a'e ze'eg kwehe arer. Ikatu wera'u ze'eg ipyahu ma'e kury. Xaxeto kwehe arer a'e wà, weruzar kar ze'eg kwehe arer teko wanupe a'e wà. Uze'eg Tupàn pe teko wanekuzaromo tuweharupi wà. Ko 'ar rehe Zaneruwhawete wiko Tupàn huwa rupi

zanerekuzaromo kury, ze'eg ipyahu ma'e heruzar kar pà zanewe kury.

23 Nuiko kwaw amogwer xaxeto wazàwe a'e. Heta tetea'u a'e wà, ta'e umàno a'e wà xe. A'e rupi upytu'u xaxeto romo wiko re wà. **24** Zezuz numàno pixik kwaw nehe. Nupytu'u pixik kwaw xaxeto romo wiko re nehe. — Apytu'u kwez kury, ereiko putar xaxeto romo herekuzar romo nehe kury, ni'i pixik kwaw amo pe nehe. **25** A'e rupi ko 'ar rehe kury, tuweharupi nehe no, upuner teko wapyro haw rehe tatahu wi nehe, aze a'e teko ur Tupàn pe wà nehe, aze a'e teko uzeruzar Zezuz rehe wà nehe. Ta'e Zezuz a'e nehe xe, wikuwe putar tuweharupi a'e nehe xe. Tuweharupi uze'eg iko Tupàn pe u pe. — Pemono kar zo herehe uzeruzar ma'e tatahu pe ne wà nehe, i'i iko izupe. — Ta'e amàno wanekuzaromo ihe xe, i'i iko izupe.

26 Zezuz a'e, xaxeto romo hekon a'e. Azeharomoete ikatuahy zanewe, ta'e uzapo ikatuahy ma'e zanewe xe. Utyryk ikatu 'ym ma'e wi no. Nuzapo pixik kwaw ikatu 'ym ma'e. Naheta pixik kwaw ikatu 'ymaw hehe no. Uzawy tuwe ikatu 'ym ma'e iapo har a'e wà. Nuiko pixik kwaw wazàwe. Tupàn upir Zezuz heraha ywak 'aromo a'e, (uzeake imuigo kar pà a'e). **27** Zezuz nuiko kwaw amogwer xaxeto wazàwe. Nuzuka kwaw Àràpuhàràna'yr Tupàn huwa rupi tuweharupi. Nuzuka kwaw ma'e'a'yr teko wanemiaipo kwer hekuzaromo. Pitài haw zo omono ma'e izuka pyr Tupàn pe. Uzemono uzezuka kar pà Àràpuhàràna'yr ài a'e. Pitài haw zo umàno. Numàno wi kwaw nehe.

28 Nezewe i'i Moizez ze'eg kwehe arer a'e. — Àràw izuapyapyr a'e wà, wiko putar xaxeto romo a'e wà nehe, i'i teko wanupe. Àràw izuapyapyr a'e wà, nutryk kwaw ikatu 'ym ma'e wi tuweharupi a'e wà. A'e rupi ko 'ar rehe kury, Tupàn uze'eg kwez wa'yr pe kury. — Ereiko putar heràpuz rehe uzekaiw ma'e romo tuweharupi nehe, nepytu'u 'ym pà nehe, i'i kwez izupe. Ta'e ta'yr nuzapo pixik kwaw ikatu 'ym ma'e a'e xe.

Zezuz wiko tuwe zanepytywà har romo Tupàn huwa rupi a'e

8 ¹Azeharomoete urumume'u Zezuz heko haw uruiko peme ure kury, xaxeto romo heko haw peme ure kury. Zanepytywà har romo hekon a'e. Wapyk in ywate Tupàn iawyze har rehe. Ikàg tuwe Tupàn zàwegatete kury. **2** Xaxeto wanuwhiaw ikàg wera'u ma'e romo hekon. Naheta pixik kwaw ikatu 'ymaw a'e pe. Kwehe mehe ywy rehe teko uzapo tâpuzrân a'e wà, Tupàn imuapyk pà nezewe a'e wà. Tupàn wiko oho ipupe a'e. Nuiko kwaw a'e pe ko 'ar rehe kury. Zezuz wiko Tupàn hâpuzuhuete pe kury, hâpuzuhu rehe uzekaiw pà kury. Tupàn uzapo a'e tâpuz ko 'ar rehe har. Awa nuzapo kwaw wà.

3 Xaxeto paw rupi a'e wà, omono ma'e Tupàn pe wà. Uzuka ma'e'a'yr huwa rupi wà. A'e rupi zanepytywà har Zezuz a'e no, omono ma'e izupe a'e no. **4** Aze mo ywy rehe hekon, nuiko iwer mo xaxeto romo. Ta'e heta amo xaxeto xe a'e wà xe. Omono ma'e Tupàn pe wà, zutew wanàmuzgwer ze'eg rupi wà. **5** Zezuz a'e, xaxeto ikàg wera'u ma'e romo hekon a'e. Xaxeto ko ywy rehe har a'e wà, uzeagaw izàwe wiko pà a'e wà. Wama'ereko haw nuzawy kwaw ima'ereko haw ywate har wà. Nezewegatete Moizez a'e no, uzypyrog Tupàn hâpuz iapo pà a'e no. Iapo 'ym mehe Tupàn uze'eg izupe. — Wytyr rehe nereko mehe aexak kar ma'e ywate har newe ihe, i'i izupe. Ezapo heràpuz hagapaw nehe, heràpuzete zàwenugar nehe, i'i izupe. A'e rupi Tupàn hâpuz ko ywy rehe har a'e, nuzawy kwaw hâpuz ywate har hagapaw a'e. **6** Xaxeto ko ywy rehe har a'e wà, upytywà teko a'e wà. Zezuz upytywà tuwe teko a'e wà. Ta'e weraha uzehe uzeruzar ma'e a'e wà xe, ze'eg ipyahu ma'e rupi a'e wà xe. Ta'e ze'eg ipyahu ma'e ikatu wera'u ze'eg kwehe arer wi a'e xe. Ta'e ze'eg ipyahu ma'e umume'u Tupàn hemiapo ràm ikatu wera'u ma'e zanewe a'e xe. **7** Aze mo ze'eg kwehe arer ikatu tuwe a'e, aze mo uhyk tuwe a'e, a'e mehe mo Tupàn numume'u iwer mo ze'eg ipyahu ma'e purupe a'e kury. **8** Tupàn wexak

wemaihu wanemiapo kwer ikatu 'ym ma'e a'e. A'e rupi uze'eg nezewe wanupe a'e.

- Uhem putar amo 'ar a'e nehe.
A'e 'ar mehe amum'e putar heze'eg
ipyahu ma'e ihe nehe, heremiapo
putar haw ihe nehe,
Izaew izuapyapyr wanupe ihe nehe,
Zuta izuapyapyr wanupe ihe nehe,
i'i wanupe.
- 9** A'e ze'eg heremimume'u ràm nehe,
uzawy putar heze'eg kwehe arer nehe.
Uzawy putar waipy wanupe
heremimume'u kwer nehe.
A'e 'ar mehe apyhyk waipy
wapo rehe ihe wà,
Ezit ywy wi wapyro pà waneraha
pà ihe wà.
Noho kwaw zepe heze'eg rupi wà.
Nuweruzar katu kwaw heze'eg wà.
A'e rupi nazekaiw katu kwaw
wanehe ihe, i'i Zanezar.
- 10** — Amume'u wi putar amo
ae heze'eg Izaew izuapyapyr
wanupe ihe nehe kury,
'ar uehm ma'e ràm rehe ihe nehe kury.
Akwaw kar putar heze'eg
wanupe nehe.
Aze tekо umuapyk ze'eg pape
rehe nehe, nukàzym kwaw nehe.
Nezewegatete amuapyk putar
heze'eg wapy'a pe nehe.
Ipureruzar wer hehe wà nehe.
Naheharaz kwaw izuwi wà nehe.
Aiko putar wazar romo ihe nehe no.
Wiko putar heremiruze'eg
romo wà nehe no.
- 11** — Amu'e putar herapi har Tupàn
ze'eg rehe ihe nehe,
ni'i kwaw teko wà nehe,
wapi har wanupe wà nehe.
— Amume'u putar Tupàn ze'eg
heànàm wanupe nehe,
a'e rupi ukwaw putar Tupàn a'e wà
nehe, ni'i kwaw teko wà nehe.
Ta'e hekwaw putar tuwe paw
rupi wà nehe xe.

Ikàg wera'u ma'e hekwaw
putar wà nehe no.

- 12** Apuhareko katu ihe wà nehe.
Nazepyk kwaw wanehe nehe,
wanemiapo kwer rehe nehe.
Nahema'enukwaw kwaw wanemiapo
kwer ikatu 'ym ma'e rehe nehe,
i'i Tupàn purupe.

13 Kwehe nehe Tupàn umume'u uze'eg ipy
teko wanupe a'e. Teko noho kwaw a'e ze'eg
rupi a'e wà. Na'e umume'u ze'eg ipyahu ma'e
wanupe. Nuweruzar kar kwaw uze'eg kwehe
arer zanewe kury. Xiruzar ze'eg ipyahu ma'e
zaiko kury. Naxiruzar kwaw ze'eg kwehe arer
kury. Aze zanekamir izemàner nehe, xityk
nehe. Nezewegatete naxiruzar kwaw ze'eg
kwehe arer kury. Ta'e xiriko ze'eg ipyahu
ma'e kury xe.

Tupàn imuweste haw azeharomoete har

- 9** 1 Nezewe i'i ze'eg kwehe arer a'e.
— Pemuwete katu Tupàn ko ze'eg rupi
katete nehe, i'i wanupe. — Pezapo tâpuzràñ
nehe, imuweste katu haw romo nehe, i'i
wanupe. **2** A'e rupi uzapo tâpuzràñ a'e wà.
Upupyakaw tâpuzràñ wà. Mokoz ipupyakaw
paw. Ipupyakaw paw ipy uhual'u wera'u
inugwer wi a'e. Uhu wera'u ma'e a'e, — Ikatu
'ym ma'e heta 'ymaw her romo a'e. Teko
omono tatainý a'e pe wà, omono wyrapew a'e
pe wà no, omono typy'ak Tupàn pe imono pyr
a'e pe wà no. **3** Ipupyakaw paw inugwer a'e,
heta amo her a'e. — Tupàn henaw, her romo
a'e. Ikatu 'ym ma'e heta pixik 'ymaw, her romo
a'e. **4** Xaxeto a'e wà, umunyk yhyk a'e pe wà,
imunykaw rehe wà. Imunykaw a'e,hekuzar
katu a'e. Ze'eg kwehe arer hyru a'e pe hin a'e
no. Uzapo ita hekuzar katu ma'e or her ma'e
teteau'hyru ipykaw romo wà. Typy'ak ywak
wi u'ar ma'e kwer hyru a'e no, a'e pe hin a'e no.
— Mana, a'e temi'u her romo waze'eg rupi a'e.
Àrâw ima'e a'e, ywyra pokokaw huwer ma'e
a'e, a'e pe tuz a'e no. Kwehe mehe Tupàn
umuapyk uze'eg ita pew rehe a'e, mokoz ita
pew rehe a'e. A'e ita a'e pe wanuz a'e wà no,
a'e tâpuzràñ pupe a'e wà no. **5** Mokoz Tupàn

heko haw pe har hagapaw a'e wà no, wapyk a'e ma'eryru 'aromo a'e wà no. Wapyk a'e pe wà, Tupàn reho teko wamuma'enukwaw pà wà. Ipuràg eteahy a'e Tupàn heko haw pe har wanagapaw wà. Ipepozaz a'e pe wà, a'e ma'e hyru 'aromo wà. Xaxeto a'e, uzuka ma'ea'yr a'e, teko wanemiapo kwer ikatu 'ym ma'e hekuzaromo a'e. Izuka mehe umupiripirik huwykwer a'e ma'eryru rehe. — Purupuhareko haw, a'e ma'e hyru her romo a'e. Ko 'ar reho namume'u katu kwaw agwer ma'e peme ihe, ta'e pekwaw katu pe xe.

6 Nezewe tåpuz reho uzekaiw ma'e uma'erekö a'e wà. Tuweharupi wixe tåpuzràn ipuyaikaw paw ipy pupe wà, ma'e iapo pà Tupàn pe wà, ma'e imono pà izupe wà no. **7** Wanuwhaw a'e, xo a'e zo wixe ipuyaikaw paw inugwer pupe a'e. Kwarahy nànàn wixe ipupe pitái haw. Weraha ma'ea'yr huwykwer uezupi, Tupàn pe imono pà, wemipa kwer hekuzaromo, teko wanemiapo kwer hekuzaromo no. Ta'e teko uzapo ikatu 'ym ma'e a'e wà xe. **8** Tekwe Puràg zanemu'e iko a'e, agwer ma'e hexak kar pà zanewe a'e. A'e tåpuzràn ipy a'e, a'e pe hin a'e. A'e 'ar mehe teko nupuner kwaw wixe haw reho ipuyaikaw pyrer inugwer pupe wà, Tupàn henaw pupe wà. **9** Nezewegatete ko 'ar reho teko nupuner kwaw uzemuawye katu kar haw reho Tupàn pe wà, ma'ea'yr izuka pà wà. **10** Ta'e a'e ma'ea'yr a'e wà xe, xo ma'e i'u pyr romo wanekon a'e wà xe. Ze'eg kwehe arer u'u kar ma'e purupe a'e. Xo temi'u reho uez'eg a'e. Numukatu kwaw zanepy'a. Uhez kar zaneretekwer zanewe no. Numukatu kar kwaw zanepy'a.

11 Zaneruwhawete Zezuz a'e, ur ywy reho a'e. Xaxeto wanuwhaw ikàg wera'u ma'e romo hekon a'e. Uzapo ikatuahy ma'e iko zanewe. Nuiko kwaw Tupàn hâpuz kwehe arer pupe. Uze'eg iko Tupàn pe zanerekuzaromo kury, amo ae tåpuz me kury. Ikatu wera'u a'e tåpuz. Naheta kwaw ikatu 'ym ma'e a'e pe. Teko nuzapo kwaw a'e tåpuz. Naheta kwaw agwer tåpuz ko ywy reho. **12** Amogwer tåpuz reho uzekaiw ma'e

ywy reho har a'e wà, weraha Àràpuhàràn huwykwer uezupi a'e wà, weraha tap'iaka'yr huwykwer uezupi a'e wà, inugwer ipuyaikaw paw pe a'e wà, Tupàn pe imono pà teko wanemiapo kwer hekuzaromo a'e wà. Zaneruwhawete Zezuz nuzapo kwaw nezewe. Uzemono uezuka kar pà zauxiapekwer wanupe. Uzakook uwý kwer, tatahu wi zanepyro pà, a'e rupi zaiko putar tuweharupi Tupàn pyr zane nehe. **13** Kwehe mehe tuweharupi xaxeto umupiripirik Àràpuhàràn huwykwer teko wanehe wà, tap'iaka'yr happy pyrer tamimukwer heityik pà wanehe wà no, wamukatu kar pà Tupàn pe wà, ta'e wanemiapo kwer ikatu 'ym ma'e na'ikatu kwaw Tupàn pe wà xe. **14** Àràpuhàràn huwykwer umukatu teko Tupàn pe a'e wà. Zaneruwhawete Zezuz huwykwer ikatu wera'u ma'ea'yr huwykwer wi a'e. Zanemuawye tuwe Tupàn a'e kury. Tekwe Puràg umur ukàgaw Zezuz pe a'e. A'e rupi uzemono uezuka kar pà, Tupàn huwa rupi. Tekwe Puràg wiko tuweharupi a'e nehe, ukàzym pixik 'ym pà a'e nehe. Izypy mehe wikuwe a'e no. Naheta pixik kwaw ikatu 'ymaw Zaneruwhawete Zezuz reho. Huwykwer hakookaw a'e, umukatu zanepy'a a'e. A'e rupi — Xiapo ma'e nehe, zanemuawye kar pà Tupàn pe nehe, naza'e kwaw nehe. Ta'e xikwaw zanepy'a imukatu awer zane xe. Naximukatu kwaw zanepy'a. Umukatu a'e. A'e rupi xiapo putar ikatu ma'e Tupàn wikuwe ma'e imurywete kar pà nehe kury.

Zezuz imàno awer reho ze'eg ipyahu ma'e

15 Zaneruwhawete Zezuz a'e, ze'eg ipyahu ma'e izar romo hekon a'e, a'e rupi uez'eg Tupàn pe zanerekuzaromo a'e. A'e rupi Tupàn umur putar ikatu ma'e zanewe nehe. Zaiko heminozgwer romo zane. — Amono putar ikatuahy ma'e hereminoz wanupe nehe, i'i tuwe Tupàn. Umur putar a'e wemimume'u kwer zanewe nehe, ta'e Zezuz umàno zanerekuzaromo a'e xe. A'e rupi Tupàn upyro teko a'e wà, wanemiapo kwer ikatu 'ym ma'e wi a'e wà. Kwehe mehe teko uzapo a'e ikatu

'ym ma'e a'e wà, ze'eg kwehe arer rupi oho mehe a'e wà.

16 Aze awa umànò etea'i a'e nehe, umume'u putar uma'e hezar pyràm a'e nehe, wànàm wanupe a'e nehe. Umuapyk kar wemimume'u kwer pape rehe nehe. Xo imànò re zo iànàm upyhyk putar ima'e kwer a'e wà nehe.

17 — Hemànò re pepyhyk putar hema'e nehe, i'i putar wanupe nehe. A'e rupi xo imànò re zo upyhyk putar ima'e kwer wà nehe. **18** Ze'eg kwehe arer uze'eg nezewe teko wanupe. — Pezuka ma'e'a'yr nehe, huwykwer imono pà Tupàn pe nehe, i'i wanupe. Xo ma'e'a'yr imànò re Tupàn heharaz wanemiapo kwer ikatu 'ym ma'e wi a'e. Aze mo teko oho ze'eg kwehe arer rupi a'e wà, ma'e'a'yr izuka 'ym pà a'e wà, a'e mehe mo Tupàn naheharaz iwer mo wanemiapo kwer ikatu 'ym ma'e wi a'e. **19** Moizez umume'u Tupàn ze'eg paw rupi purupe a'e. Na'e upyhyk tapi'aka'yr huwykwer, upyhyk Àràpuhàrànu huwykwer no. Omono 'y inuromo. Umupiripirik teko paw wanehe, ze'eg kwehe arer ipape rehe no. Upyhyk Àràpuhàrànu rawer ipiràg ma'e, amo ka'a ruwer inuromo iàpixi pyrer, a'e ma'e'a'yr huwykwer pupe imono pà. A'e re umupiripirik teko wanehe imono pà kury, ta'e Tupàn uzapo kar nezewe a'e xe. **20** — Tupàn umur uze'eg kwez peme a'e, heruzar kar pà peme a'e, i'i Moizez teko wanupe. — Amupiripirik ko ma'eruwu kwer teko penehe ihe kury. A'e rupi Tupàn pepyro penemiapo kwer wi kury, i'i Moizez teko wanupe. **21** Nezewegatete Moizez umupiripirik ma'eruwu kwer a'e tâpuzràn rehe no, ma'e ipupe har wanehe no. Teko umuwete katu Tupàn a'e wà, a'e ma'e rehe ma'e huwykwer imupiripirikaw rehe a'e wà. **22** Azeharomoete Moizez umukatu ma'e paw ze'eg kwehe arer rupi, ma'eruwu kwer imupiripirik pà wanehe. Aze ma'e umànò nehe, uwý kwer hakook pà nehe, xo a'e mehe Tupàn umunàn putar teko wanemiapo kwer ikatu 'ym ma'e nehe, wanwi nehe.

Umànò Zezuz zaneremiapo kwer hekuzaromo a'e, àràpuhàrànu'yr zàwe a'e

23 A'e ma'e tâpuzràn pupe har a'e wà, Tupàn hemiapo putar haw hagapaw záwenugar a'e wà, ukwaw kar Tupàn hemiapo putar haw purupe a'e wà. Ma'e'a'yr huwykwer imupirik pyrer umukatu a'e ma'e Tupàn huwa rupi a'e wà. Numukatu kwaw teko a'e wà. Xo Zaneruhawete Zezuz izuka haw umukatu teko Tupàn pe a'e wà. Ma'e'a'yr huwykwer umukatu zanepyro haw hagapaw a'e, ywy rehe har a'e. Nazanepyro kwaw a'e. **24** Zaneruhawete Zezuz a'e, nuiko kwaw tâpuzràn pupe a'e, nuiko kwaw teko wanemiapo kwer pupe a'e. Ta'e a'e tâpuzràn a'e xe, nuzawy kwaw Tupàn heko hawete a'e xe. Zaneruhawete oho ywate, wixe tuwe Tupàn huwa rupi azeharomoete, zanerekuzaromo uze'eg pà izupe. Wiko tuwe a'e pe kury. **25** Tâpuz rehe uzeikai ma'e wanuwiaw a'e, zutew romo hekon a'e. Wixe tâpuzràn pupe kwarahy nànà, ma'e huwykwer heraha pà a'e pe. Zaneruhawete nuiko kwaw nezewe. Nuzezuka kar kwaw kwarahy nàn. **26** Aze mo nezewe hekon, a'e mehe mo upuraraw mo ma'erahy kwer tuweharupi, a'e mehe mo umànò mo tuweharupi, ywy iapo mehe arer we mo te ko 'ar rehe. Nan. Pitài haw uzexak kar. Upaw etea'i teko ko ywy rehe waneko haw a'e wà. Uhem etea'i iahykaw. Zaneruhawete uhem kwez xe ko ywy rehe kury, uzezuka kar pà teko wanemiapo kwer ikatu 'ym ma'e imunàn pà wanwi kury. A'e rupi Tupàn nuzepyk kwaw uzeruzar ma'e wanehe a'e nehe. **27** Teko pitàitâigatu umànò putar pitài haw a'e wà nehe. A'e re Tupàn umume'u putar wanemiapo kwer a'e nehe, pitàitâigatu a'e nehe. A'e re uzepyk putar ikatu 'ym ma'e iapo har wanehe nehe. Upyro putar wemiruze'eg wà nehe. **28** Nezewegatete Zaneruhawete umànò pitài haw a'e, teko tetea'u wanemiapo kwer ikatu 'ym ma'e imunàn pà wanwi a'e. Uzewyr putar wà amo 'ar mehe nehe. Nur kwaw ikatu 'ym ma'e imunàn pà nehe. Amo teko wàro

izewyr àwàm waiko a'e wà. Zezuz ur putar a'e teko wapyro pà tatahu wi a'e wà nehe.

10 ¹Aze ywyra ikàg a'e nehe, i'àg uzawy wewer a'e ywyra a'e. Nezewegatete zutew ukwaw ze'eg kwehe arer a'e wà, a'e rupi ukwaw wewer Tupàn hemiapo kwer a'e wà, hemiapo ràm a'e wà no. Ikatu wewer Tupàn pe wà. Kwarahy nànàñ uzuka ma'ea'yìr wà, wemiapo kwer ikatu 'ym ma'e hekuzaromo wà. Ze'eg kwehe arer numukatu kwaw Tupàn hemiruze'eg a'e wà. ²Aze mo a'e ze'eg umukatu a'e Tupàn imuweste har a'e wà, a'e mehe mo — Zanekatu tuwe Tupàn pe zane kury, i'i mo wà. A'e rupi mo upytu'u mo ma'ea'yìr izuka re wà no. ³Nupytu'u kwaw wà. — Zanekatu tuwe Tupàn pe, ni'i kwaw wà. Kwarahy nànàñ uzuka ma'ea'yìr wà. A'e rupi tuweharupi ima'enukwaw wemiapo kwer ikatu 'ym ma'e rehe wà. ⁴Ta'e tapi'ak huwykwer hakookaw a'e xe, Árapuhàràñ huwykwer hakookaw a'e xe, nupuner kwaw ikatu 'ym ma'e puruwi imunànav rehe a'e xe.

5 A'e rupi ywy rehe ur etea'i mehe Zaneruwhawete uze'eg nezewe Tupàn pe a'e, u pe a'e.

— Ma'ea'yìr izuka haw
nanemurywete kar kwaw a'e.
Ma'e imur pyrer nanemurywete
kar kwaw a'e.

A'e rupi eremuhyk heretekwer
ràm kwez ihewe ne.

6 Teko umunyk tata ma'ea'yìr iwy pe wà,
ma'e zuka haw rehe hapy kar pà paw
rupi wà.

Nanemurywete kar kwaw nezewe wà.
Uzuka ma'ea'yìr wemiapo kwer ikatu
'ym ma'e hekuzaromo wà, neruwa
rupi wà, tuweharupi wà.
Nanerurywete kwaw izuka mehe.

7 A'e rupi aze'eg kwez newe ihe.
— Aiko xe ihe, Tupàn.
Ezapo ma'e ihewe neremimutar
rupi nehe,
neze'eg kwehe arer purupe
imur pyrer rupi ne.

Eremume'u ihewe neremipa
ràm kwez ne.

Ezapo kar tuwe nezewe haw nehe,
hezuka kar pà teko wanemipa
kwer ikatu 'ym ma'e hekuzaromo
nehe, a'e kwez newe,
i'i Zaneruwhawete Tupàn
pe kwehe mehe.

8 Nezewe uze'eg Zezuz Tupàn pe izypy
mehe a'e. — Aze uzuka ma'ea'yìr newe wà
nehe, aze umur ma'e newe wà nehe,
nanerurywete kwaw nehe. Aze umunyk tata
ma'ea'yìr iwy pe newe wà nehe, hapy kar pà
paw rupi wà nehe, ma'e zuka haw rehe wà
nehe, wemiapo kwer ikatu 'ym ma'e
hekuzaromo wà nehe, a'e mehe nanerurywete
kwaw nehe, i'i izupe. Teko uzapo a'e ma'e
paw rupi wà, Tupàn ze'eg kwehe arer heruzar
pà wà. Numurywete kar kwaw Tupàn wà, a'e
ma'e iapo mehe wà. **9** A'e rupi nezewe i'i
Zezuz Tupàn pe a'e kury. — Aiko xe ihe
Tupàn, azapo putar neremipa putar haw ihe
nehe, i'i izupe. A'e rupi Tupàn umupytu'u kar
teko ma'ea'yìr izuka re nehe kury, penemipa
kwer ikatu 'ym ma'e hekuzaromo izuka re
nehe kury, i'i purupe. Zezuz imàno haw upyta
ma'ea'yìr paw wamàno haw hekuzaromo a'e
kury. Ma'ea'yìr zuka haw numunàgatu kwaw
ikatu 'ym ma'e. (Upyta Zezuz imàno haw
hagapaw romo.) Xo Zezuz izuka haw
umunàgatu tuwe ikatu 'ym ma'e puruwi a'e.
10 Zezuz Zaneruwhawete uzapo Tupàn
hemiapo putar haw paw rupi. Uzemono
uezuka kar pà. Pitài haw umàno. A'e rupi
zanemukatu zaneremipa kwer ikatu 'ym
ma'e wi paw rupi katete kury. Numàno wi
kwaw nehe, ta'e uhyk imàno haw pitài haw
Tupàn pe a'e xe.

11 Zutew wapytywà har a'e wà, Xaxeto a'e
wà, tuweharupi u'äm hàpuz me a'e wà,
uma'erekò haw iapo pà Tupàn huwa rupi a'e
wà. Tuweharupi uzapo wi wi a'e ma'e
upytu'u 'ym pà wà. Agwer ma'ea'yìr zuka
haw numunàñ kwaw ikatu 'ym ma'e puruwi
a'e. **12** Zaneruwhawete Zezuz a'e, pitài haw
uezuka kar a'e. Uhyk tuwe Tupàn pe kury.

Numumàno kar wi pixik kwaw nehe. Wapyk Zezuz oho huwake kury, iawyze har rehe kury. Wiko tuwihawete romo huwake kury.

13 Tupàn uze'eg iko izupe kury. — Amo 'ar mehe neàmàtyry'ymar weruzar putar neze'eg a'e wà nehe, ereiko putar wanuwihaw romo nehe, i'i iko izupe. **14** Pitái haw uezuka kar a'e. Nezewé umukatu ikatu 'ym ma'e wi utyryk ma'e a'e wà. Tuweharupi ikatuahy putar Tupàn pe wà nehe, ikatu 'ym ma'e iapo 'ymar zàwegatete wà nehe.

15 Tekwe Puràg uze'eg zanewe a'e no, uze'eg imuapyk kar pà pape rehe kwehe mehe a'e no.

16 — Amume'u putar tuwe ze'eg ipyahu ma'e ihe nehe,
heremiruze'eg wanupe ihe nehe,
amo 'ar mehe ihe nehe,
i'i Zanezar a'e.

— Heremiruze'eg ima'enukwaw putar heze'eg rehe tuweharupi wà nehe.
Hurywete putar heze'eg heruzar pà tuweharupi wà nehe no,
i'i Tekwe Puràg zanewe.

17 Amo ae ma'e umume'u a'e no.

— Nahema'enukwaw pixik kwaw wanemiapo kwer ikatu 'ym ma'e rehe ihe nehe,
i'i zanewe no.

18 Tupàn umunàn zaneremiapo kwer ikatu 'ym ma'e zanewi a'e, a'e rupi naxiuka kwaw ma'e'a'yr zane kury, zaneremiapo kwer ikatu 'ym ma'e hekuzaromo zane kury.

Zaha Tupàn huwakea'i zane kury

19-20 Kwehe mehe teko nuixe kwaw inugwer tâpuzrân ipupyaikaw pyrer pupe wà. Xo tâpuz rehe uzekaiw ma'e wanuwihaw wixe a'e pe a'e, Tupàn pe uze'eg pà teko wanekuzaromo a'e. Ko 'ar rehe zapuner zaneze'egaw rehe Tupàn pe zane kury, wyzai 'ar mehe zane kury. Ta'e Zezuz uezuka kar zanerekuzaromo a'e xe. Izuka awer a'e, nuzawy kwaw Tupàn hâpuz hewàpytymawokaw zanewe a'e. Tupàn pe

zaneze'egaw a'e, nuzawy kwaw hâpuz me zaneixe haw a'e. Zapuner wyzai 'ar mehe ipupe zaneixe haw rehe nehe, huwa rupi nehe.

21 Zezuz a'e, a'e xaxeto ài hekon a'e. **22** A'e rupi zapuner Tupàn pe zaneze'egaw rehe wyzai 'ar mehe nehe. Tuwe nazaneremu'em kwaw izupe nehe. Tuwe zazerizar hehe azeharomoete nehe, izupe zaneze'eg mehe nehe. Tuwe umukatu zanepy'a nehe. A'e rupi zanereharaz putar zaneremiapo kwer ikatu 'ym ma'e wi nehe. Xiputuka zanekamir 'y pupe zane. A'e rupi xigatu. Tuwe Tupàn zanemukatu nezwegatete nehe no, ikatu 'ym ma'e wi zanemunyryk pà nehe no. **23** Xiàro Zezuz tur àwàm zaiko zane. Xiàro zanerekò àwàm Tupàn heko haw pe no. Tuwe nazapytu'u kwaw hào re nehe. Ta'e Tupàn umume'u tuwe tur àwàm a'e xe. Umume'u tuwe zaneho àwàm a'e no xe. Azeharomoete iz'e'eg a'e. Tuwe zazerizar hehe nehe.

24 A'e rupi, tuwe zazekaiw zanezehezehe nehe, zazepatywàtìwà pà nehe. Nezewé mehe zazeamutamutar putar nehe. Xiapo putar ikatuahy ma'e nehe no. **25** Zazemono'og zaiko tuweharupi zane, Tupàn pe zaneze'eg pà zanezagàr pà zane. Tuwe nazapytu'u kwaw zanemono'og ire nehe. Amo uzeruzar ma'e upytu'u uzemono'og ire wà. Na'ikatu kwaw nezewé haw. Pepytu'u zo wazàwe nehe.

— Tuwe zazemono'og tuweharupi nehe, peze pezeupeupe nehe, ta'e uehem etea'i Zanezar 'ar a'e nehe xe.

26 Aze xikwaw kar Zezuz rehe ze'eg azeharomoete har nehe, amo teko wanupe nehe, aze a'e re a'e teko uzapo wi wi ikatu 'ym ma'e oho iko nehe, a'e mehe naheta kwaw amo ae ma'e izuka pyràm a'e nehe, hemiapo kwer ikatu 'ym ma'e hekuzaromo a'e nehe. **27** Nan. Naheta kwaw amo ae ma'e'a'yr izuka pyr a'e wà, naheta kwaw amo ae teko izuka pyr a'e wà, a'e teko wanupe a'e wà. Naheta kwaw amo ae wapyro har nehe. A'e teko wàro putar ma'e uzeapo ma'e ràm waiko a'e wà nehe. Tupàn umume'u putar wanemipa kwer a'e nehe. Uzepyk putar wanehe nehe. Tupàn iàmàtyry'ymar ukaz putar tatahu hakuahy ma'e pupe a'e wà nehe.

28 Nezewe i'i ze'eg kwehe arer Moizez pe imur pyrer a'e. — Aze amo awa uze'eg zemueteahy Tupàn rehē a'e nehe, aze umuwete tupàn a'u'a u'e nehe, aze mokoz teko wenu iz'e'eg zemueteahy haw wà nehe, aze mokoz teko wexak tupàn ua'u imuwete haw wà nehe, aze na'iruz teko wenu wà nehe, a'e mehe, tuwe teko uzuka a'e awa a'e wà nehe, ipuhareko 'ym pà a'e wà nehe, i'i ze'eg kwehe arer. **29** Tupàn Hekwe zanepuhareko a'e. Ta'yur umàno uwý kwer hakook pà zanerekuzaromo a'e, zanemukatu pà ikatu 'ym ma'e wi a'e. A'e rupi Tupàn umume'u tuwe zanepyro haw. Aze awa uze'eg zemueteahy ta'yur rehē nehe, aze uze'eg uryw ahyahy imàno awer rehē nehe, zanepuhareko haw rehē nehe, Tupàn uzepyk wera'u putar tuwe a'e awa rehē nehe. **30** Ta'e nezewe uze'eg Tupàn kwehe mehe xe. — Ihe ihe, azepyk putar ikatu 'ym ma'e iapo har wanehe ihe nehe. Amekuzar putar wanemapiro kwer ihe nehe, i'i purupe. — Amume'u putar wanemapiro kwer ihe nehe, i'i purupe. **31** Ikatu 'ym ma'e iapo har uzemumikahy putar a'e wà nehe, ta'e Tupàn uzepyk putar wanehe nehe xe. **32** Pema'enukwaw peneko awer kwehe arer rehē. A'e 'ar mehe peinu Zezuz rehē ze'eg puràg. Pezeruzar hehe. A'e re uzeruzar 'ym ma'e upuraraw kar ma'erahy tetea'u peme a'e wà. Napepytu'u kwaw hehe pezeruzar ire. Napezemumikahy kwaw ipuraraw mehe. **33** Tuweharupi teko uze'eg zemueteahy penehe wà no. Uzapo ikatu 'ym ma'e peme wà no. Upuraraw kar ma'erahy wanupe wà no, uzeruzar ma'e zutew 'ym wanupe wà no. — Zaha wapyr nehe, ma'erahy ipuraraw pà wainuromo nehe, peze pezeupeupe. Ta'e pekàg pezeruzar haw rehē pe xe. **34** Tuwihaw umunehew kar amo uzeruzar ma'e zemunehew paw pe a'e wà. Peho zemunehew paw pe a'e uzeruzar ma'e wanexak pà no, wapytywà pà no. Tuwihaw uphyk kar pema'e penapuz wi wà no. Penurywete heraha mehe. — Tuwe weraha zanema'e zanewi wà nehe, peze pezeupeupe. — Ta'e Tupàn umur ma'e ikatu wera'u ma'e zanewe amo 'ar mehe a'e nehe xe, peze

pezeupeupe. — Zaiko putar ipyr tuweharupi nehe, izuwi zaneho pixik 'ym pà nehe, peze pezeupeupe. **35** Pekàg tuwe nehe, hehe pezeruzar ire pepytu'u 'ym pà nehe. Ta'e aze pezeruzar tuwe hehe nehe, pepytu'u 'ym pà nehe, Tupàn uzapo putar ikatuahy ma'e peme a'e nehe. **36** Tupàn umume'u ikatu ma'e peme wemimur ràm a'e. Aze napepytu'u kwaw hehe pezeruzar ire nehe, a'e mehe pezapo wi wi putar hemiapro putar haw nehe. A'e mehe Tupàn umur putar tuwe a'e wemimume'u kwer peme a'e nehe. **37** Ta'e nezewe i'i Tupàn ze'eg pape rehē imuapyk pyrer a'e xe.

Nal'iàrew kwaw nehe kury.
Ur ma'e ràm ur putar nehe kury.
Nal'iàrew kwaw tur àwàm nehe.

38 Heremiruze'eg ikatu ma'e iapo
har a'e wà nehe,
Uzeruzar wi wi putar herehe
a'e wà nehe.
Wiko putar tuwe hepyr
tuweharupi wà nehe.
Aze amo upytu'u herehe uzeruzar
ire wà nehe,
Na'ikatu pixik kwaw ihewe wà nehe,
i'i ze'eg kwehe arer.

39 Nazaiko kwaw uzeruzar ire upytu'u ma'e romo zane. Nazaiko kwaw tatahu pe oho ma'e ràm romo. Zazeruzar tuwe hehe. Zanepyro ikatu 'ym ma'e wi a'e, tatahu wi a'e.

Kwehe mehe teko tetea'u uzeruzar Tupàn rehē a'e wà

11 **1** Zazeruzar Zezuz rehē zane. A'e rupi xikwaw tuwe tatahu wi zanepyro àwàm zane. Xikwaw tuwe Tupàn pyr zaneho àwàm. Naxixak kwaw heko haw kury. Xikwaw a'e pe zaneho àwàm.

2 Kwehe mehe amogwer teko uzeruzar hehe a'e wà. A'e rupi ikatu Tupàn pe wà.

3 Tupàn uzapo ywy a'e, uzapo ywak a'e no, uze'eg pà a'e. Zazeruzar hehe zane, a'e rupi — Uzapo tuwe a'e, za'e izupe. Zazeruzar iapo awer rehē. Zanezeruzar haw nuzawy kwaw a'e pe zanerekó awer zanewe. Izypy mehe Tupàn nuzapo kwaw amo ma'e amo ae

ma'e romo a'e. Nan. Naheta kwaw ma'e izypy mehe. Xo uez'eg rupi zo uzapo ma'e paw a'e. Ma'e 'ym uezapo ma'e romo. Ta'e naheta kwaw ma'e a'e 'ym mehe a'e xe. Xo Tupàn zo heta izypy mehe a'e.

4 Apew uzeruzar Tupàn rehe a'e, a'e rupi uzuka ma'eal'yr Tupàn pe a'e. Tyky'yr Kain a'e, nuweruzar kwaw Tupàn a'e. Nuzuka kwaw ma'eal'yr Tupàn pe. Xo ma'e itym pyrer zo omono izupe. A'e rupi Apew hemimono kwer ikatu wera'u Tupàn pe. Uzeruzar Apew Tupàn rehe, a'e rupi ikatu ma'e iapo har ài hekon huwa rupi, ta'e hemimono kwer ikatu izupe xe. Umàno Apew. Wikuwe ma'e ài hekon zanewe kury, ta'e xikwaw izeruzar awer zane xe.

5 Enok a'e no, uzeruzar tuwe hehe a'e no, a'e rupi numàno kwaw amogwer wazawe a'e. Tupàn upir Enok heruwà uezupe ywak rehe, imumàno kar 'ym pà. Ni amo nuexak kwaw hetekwer a'e re wà. Ta'e Tupàn upir heruwà uezupe xe. Nezewe i'i Tupàn ze'eg pape rehe imuapyk pyrer. — Enok a'e, ywy rehe wiko mehe Tupàn pyr oho 'ym mehe ikatuahy Tupàn pe a'e, i'i ze'eg kwehe arer. **6** Aze teko nuzeruzar kwaw Tupàn rehe a'e wà nehe, nupuner kwaw imurywete kar haw rehe a'e wà nehe. Aze teko heko wer Tupàn hemiruze'eg romo wà nehe, tuwe uzeruzar hehe wà nehe. Tupàn uzapo putar ikatu ma'e teko wanupe nehe, aze a'e teko wekar Tupàn a'e wà nehe. — Tupàn hemuigo kar putar tuwe uzepyrr a'e nehe, ta'e azeruzar hehe ihe xe, aze i'i uezupe wà nehe, aze uzeruzar tuwe hehe wà nehe, a'e mehe oho putar Tupàn pyr wà nehe.

7 Uzeruzar Noe hehe a'e no. A'e rupi wenu izel'eg mehe. — Àmànuhu ukyr putar nehe, ywy paw ipyk pà nehe, i'i Tupàn izupe. Noe wenu izel'eg mehe. — Ezapo kanuhu uhua'u ma'e nehe, i'i izupe. Weruzar Noe izel'eg. A'e rupi uzepyro àmànuhu wi, wànàm wapyro pà ywy rehe har wanehe ipykaw wi no. Ywy rehe har na'ikatu pixik kwaw a'e 'ar mehe wà. Noe weruzar Tupàn. Amogwer nuweruzar kwaw wà. A'e rupi Tupàn uzepyk amogwer wanehe. Noe wiko ikatu ma'e iapo har ài



Tupàn pe, ta'e uzeruzar izel'eg rehe xe. A'e rupi Tupàn nuzepyk kwaw hehe.

8 Amo kwarahy tetea'u upaw a'e wà. Na'e Àmàrààw wikuwe a'e pe. Amo 'ar mehe Tupàn uez'eg oho Àmàrààw pe a'e kury. — Amuàgà'yam amo ywy kwez newe ihe. Eiko echo a'e ywy rehe nehe, nezuapyapr waneraha pà nezeupi nehe, i'i Tupàn izupe. Àmàrààw uzeruzar hehe. A'e rupi weruzar izel'eg. Wezar uiwy, oho àwàm ikwaw 'ym pà. **9** Tupàn umume'u ywy izupe. Uzeruzar Àmàrààw izel'eg rehe. Wiko oho a'e ywy rehe. — Nuiko kwaw ko ywy rehe har romo a'e, i'i a'e ywy rehe har izupe a'e wà. Wiko a'e ywy rehe tåpuzràn pupe, wa'yr Izak ipyr, wemimino Zako ipyr. Ta'e Tupàn umume'u a'e ywy Àmàrààw izuapyapr wanupe a'e no xe, Izak Zako wanupe a'e no xe. **10** Wiko a'e ywy rehe wà. Wàro amo taw pe oho àwàm wà. — Tupàn ima'enukwaw amo tawhu rehe. Uzapo a'e taw kwez kury. Aha putar a'e taw pe nehe, aiko putar a'e pe amo 'ar mehe nehe. Ni amo nuweityk kwaw a'e taw a'e wà nehe, i'i Àmàrààw.

11 Tua'uetu tuwe Àmàrààw. Nupuner kwaw upurumuzàgaw rehe. Uzeruzar Tupàn ze'eg rehe. A'e rupi upuner upurumuzàgaw rehe. Te Xar a'e, Àmàrààw hemireko a'e, ihya'uetu tuwe a'e no. Nupuner kwaw

umemyr haw rehe no. Imen uzeruzar Tupàn hemimume'u kwer rehe. A'e rupi imemyr kury. **12** Umàno etea'i Àmàrààw a'e 'ar mehe. Upurumuzàmuzàg a'e. Heta teteau' i zuapayapr a'e wà. Waneta haw nuzawy kwaw zahytata ywak rehe har waneta haw a'e wà. Waneta haw nuzawy kwaw ywyxig ryru izywyr har waneta haw wà no.

13 Apew a'e, Noe a'e no, Àmàrààw a'e no, umàno a'e wà. Nupytu'u kwaw Tupàn rehe uzeruzar ire umàno 'ym mehe wà. Nuexak kwaw Tupàn hemimume'u kwer wà. Uzeruzar hehe wà. Wazeruzar haw nuzawy kwaw muite wi ma'e hexakaw wà. — Ikatuahy Tupàn hemiapo ràm a'e, i'i izupe wà. — Zaiko amo ae ywy rehe har ài ko ywy rehe zane, i'i uezupe wà. — Nazaiko kwaw ko ywy rehe har romo zane. Zaha zanerekohaw azeharomoete har pe nehe, i'i uezupe wà. **15** Na'ima'enukwaw kwaw weko awer ipy rehe wà. Aze mo iho wer weko awer pe wà, upuner mo uzewyr haw rehe a'e pe wà. **16** Wàro weko àwàm ikatu wera'u ma'e pe oho àwàm wà. Ywak rehe Tupàn pyr oho àwàm wàro wà. A'e rupi Tupàn na'imaranugar kwaw wanuwi. — Hezar, tuwe i'i ihewe nehe, i'i Tupàn iko wanupe. Ta'e umuàgì'ym taw kwez wanupe kury xe, waneko àwàm kwez wanupe kury xe.

17-18 Uzeruzar Àmàrààw Tupàn rehe.

— Urupytywà putar ihe nehe, a'e rupi nepurumuzàg putar nehe, i'i Tupàn izupe. Àmàrààw uzeruzar ize'eg rehe. A'e rupi ta'y' kury. Izak ta'y' her romo a'e. — Izak izuapayapr a'e wà nehe, xo a'e zo wiko putar neuapayapr romo heruwa rupi a'e wà nehe, i'i Tupàn izupe. Amo 'ar mehe Tupàn umume'u amo ae ma'e Àmàrààw pe. — Ezuka nera'y' nehe, emunyk tata iwy pe nehe, hapy pà ma'e'a'y' ài nehe, heruwa rupi nehe, i'i izupe. Uzemumikahy Àmàrààw ize'eg henu mehe. — Máràzwé tuwen aipo pa, i'i izupe. — Aipo Àmàrààw weruzar putar

heze'eg nehe, i'i Tupàn izupe. Weruzar ize'eg. Weraha wa'y' ywytyr rehe, izuka àwàm me. Izuka 'ym mehe we Tupàn uze'eg izupe. — Ezuka zo nehe ty, nepureruzar wer heze'eg rehe ne. Heze'eg rehe nepureruzar wer haw nuzawy kwaw heze'eg heruzar haw ihewe. Azeharomoete nepureruzar wer heze'eg rehe, i'i izupe.

19 — Azuka putar hera'y' nehe, i'i Àmàrààw a'e 'ar mehe a'e. — Ta'e Tupàn upuner imugweraw kar haw rehe imàno re a'e xe, i'i izupe. Umàno ma'e kwer ài hekon u pe a'e, ukweraw wi ma'e kwer ài hekon izupe no.

20 Izak uzeruzar Tupàn rehe a'e no. A'e rupi umume'u uma'e paw wa'y' wanupe, Zako Ezau wanupe.

21 Zako uzeruzar Tupàn rehe a'e no. A'e rupi umume'u Tupàn hemiapo ràm ikatu ma'e Zuze ta'y' wanupe no, umàno etea'i mehe no. Upu'äm ywyra opokokaw ipyhyk pà, Tupàn imuweste katu pà, ta'e tua'uhez a'e xe.

22 Zuze uzeruzar hehe a'e no. A'e rupi umàno etea'i mehe umume'u wànàm Ezit ywy wi weko awer pe waho àwàm. — Peraha heretekwer umàno ma'e ràm hereko awer pe nehe, itym pà a'e pe nehe, i'i wa'y' pe.

23 Moizez tu a'e, ihy a'e no, uzeruzar Tupàn rehe a'e wà no. A'e rupi umim wa'y' zauxiapekwér wanuwi wà, izexak kar ire wà. Na'iruz zahy umumaw imim pà wà. Wexak wa'y' ipuràg eteahy haw wà. Nukyez kwaw Ezit ywy rehe har wanuwhaw wi wà. Nuweruzar kwaw wà.

24 Moizez uzemugakwaw Ezit ywy rehe har wanuwhaw Parao her ma'e hàpuz me a'e. Uzeruzar Tupàn rehe. A'e rupi tua'u mehe uehm oho a'e wi. — Naiko kwaw tuwhaw tazyr imemyr romo ihe, i'i uezupe.

25 — Aze aiko tuwhaw hàpuz me nehe, aiko putar hemetarer katu ma'e romo nehe. Aze aiko Tupàn hemiruze'eg wapyr nehe, ma'e hereko 'ymar romo aiko putar nehe. Naiko kwaw tuwhaw ipyr nehe, ta'e ikatu 'ym ma'e iapo har romo hekon a'e xe. A'e rupi hemigo kar putar ikatu 'ym ma'e iapo har romo a'e nehe no xe. Tàrityka'i Tupàn uzepyk putar ikatu 'ym ma'e iapo har wanehe

nehe. Aiko putar Tupàn hemiruze'eg wapyr nehe, i'i izupe. **26** — Aze mo aiko tuwihaw ipyr, xo ko 'ar rehe mo aiko hemetarer katu ma'e romo. Aze naiko kwaw ipyr nehe, upuraraw kar putar ma'erahy ihewe nehe, heruwiawete ur ma'e ràm heruzar haw rehe nehe. Ikatu putar nezewe haw ihewe nehe, ta'e nezewe mehe Tupàn umur putar ikatuahy ma'e ihewe amo 'ar mehe nehe xe, i'i Moizez.

27 Ezit ywy rehe har wanuwiaw wikkahy Moizez pe a'e. Moizez uzeruzar Tupàn rehe. A'e rupi nukyze kwaw tuwihaw wi. A'e rupi uhem oho Ezit wi. Nuzewyr pixik kwaw a'e pe. Nuexak kwaw Tupàn, ta'e ni amo teko nuexak kwaw Tupàn a'e wà xe. Hexakar ài hekon a'e. Ta'e uzeruzar hehe a'e xe. Hehe izeruzar awer nuzawy kwaw hexakaw Moizez pe a'e. **28** Uzeruzar Tupàn rehe. A'e rupi nezewe i'i wànàm wanupe. — Ko ywy rehe har wanuwiaw a'e, na'iporomono kar wer kwaw zanerehe xe wi a'e. A'e rupi Tupàn uzepyk putar hehe nehe kury, pyhaw nehe kury. Heko haw pe har ur putar xe a'e nehe. Uzuka putar ta'yripy tåpuz nànàgatu har paw rupi katete a'e wà nehe. Pemono Àràpuhàràn huwykwer ulken iapyr nehe, penàpuz me nehe. A'e mehe nuzuka kwaw pena'yripy wà nehe. Xo Ezit ywy rehe har wana'yripy tåpuz nànàgatu har umàno putar wà nehe, i'i Moizez wànàm wanupe.

29 Izaew izuapyapyr uzeruzar Tupàn rehe a'e wà, a'e rupi wahaw ryahu piràg a'e wà, ta'e 'y uezepka wanupe a'e xe. A'e ywy nuzawy kwaw ywy iàkym 'ym ma'e ài a'e 'ar mehe a'e, a'e Tupàn rehe uzeruzar ma'e wanupe a'e. Zauxiapekwer Ezit ywy rehe har uezagaw zepe u'yahaw pà a'e wà no. 'Y umim zauxiapekwer a'e wà. Umàno paw rupi wà.

30 Izaew izuapyapyr uzeruzar Tupàn rehe wà. A'e rupi umumaw 7 'ar Zeriko tawhu izywyr wata pà wà. Tupàn ze'eg heruzar pà wà. A'e rupi Tupàn weityk pàrirogaw tawhu izywyr har a'e, wemiruze'eg wapytywà pà a'e, ta'e uzeruzar hehe a'e wà xe. **31** A'e 'ar mehe mokoz zutew wixe Zeriko tawhu pe a'e wà, a'e pe har waneta haw wakàgaw hexak pà a'e wà. Taw pe har ipuruzuka wer a'e mokoz awa

wanehe wà. Amo kuzàwyzài a'e, Ha'aw her ma'e a'e, upytywà a'e mokoz awa a'e wà, wamim pà teko wanuwi a'e wà. Amo ae 'ar mehe zutew a'e wà, uzàmàtyry'ym a'e taw pe har oho a'e wà. Uzuka taw pe har wà, ta'e taw pe har nuweruzar kwaw Tupàn ze'eg a'e wà xe, (ta'e iro Tupàn pe a'e wà xe, ta'e uzapo iaiw ma'e Tupàn huwa rupi a'e wà xe). Nuzuka kwaw Haape wà, ta'e uzeruzar Tupàn rehe a'e xe.

32 Namume'u kwaw amogwer hehe uzeruzar ma'e waneko awer peme ihe nehe, ta'e heta tetea'u a'e wà xe. Uhyk kury. Aze mo nuhyk kwaw, amume'u mo waneko awer peme. Aiko waner wà. Zineàw, Marak, Zàxàw, Zete, Tawi, Xamuew, amogwer Tupàn ze'eg imume'u har wà no. Paw rupi katete uzeruzar Tupàn rehe wà. A'e rupi Tupàn upyro a'e wà, wapytywà pà a'e wà.

33 Uzeruzar hehe paw rupi wà. A'e rupi aze amo ae ywy rehe har ur wàmàtyry'ym pà wà, a'e uzeruzar ma'e nukyze kwaw wanuwi wà. Umumaw a'e Tupàn heruzar 'ymar wakàgaw wà. Ta'e Tupàn upytywà a'e wà xe. Uzapo ikatu ma'e Tupàn heruzar pà wà. A'e rupi Tupàn omono putar wemimume'u kwer ikatu ma'e wanupe a'e. Amo zawaruhu ipuru'u wer amo Tupàn hemiruze'eg rehe a'e wà. A'e awa uzeruzar Tupàn rehe wà. A'e rupi Tupàn nu'u kar kwaw wemiruze'eg zawaruhu wanupe wà. **34** Amo umuwew tata henyhu ma'e a'e wà, ta'e Tupàn upytywà a'e wà xe, ta'e uzeruzar hehe a'e wà xe. Amo ipuruzuka wer wanehe takihepuku pupe wà. Tupàn nuzuka kar kwaw wà. A'e Tupàn rehe uzeruzar ma'e a'e wà, nuiko kwaw ikàg ma'e romo a'e wà. Tupàn upytywà wà. A'e rupi ikàg ma'e romo wanekon wà. Ikàg wà, amo ywy rehe har wàmàtyry'ym mehe wà. Uzuka zauxiapekwer amo ae ywy rehe har wà, ta'e a'e zauxiapekwer heixe wer Zutez ywy rehe wà xe. **35** Amo kuzà uzeruzar Tupàn rehe a'e wà no. A'e rupi Tupàn umugweraw kar wamemyr wanupe wà, wamàno re wà. Teko upyhyk amo uzeruzar ma'e a'e wà. — Aze peputy'u Tupàn rehe pezeruzar ire nehe, pepuner pehemaw rehe zemunehew paw wi

nehe, i'i wanupe wà. Aze napetytu'u kwaw pezeruzar ire nehe, apupetek kar putar nehe, apuzuka kar putar nehe, i'i wanupe wà. A'e uzeruzar ma'e nypytu'u kwaw Tupàn rehe uzeruzar ire wà. — Zanemào re zakweraw wi putar nehe, zanerekò àwàm ikatu wera'u ma'e pe zaneho pà nehe, i'i uezuepeu wà. A'e rupi zauxiapekwer uzuka wà. **36** Teko uze'eg zemueteahy amo rehe wà, upetepetek wà no. Uzàpixipixi amo wà no. Umunehew kar amo zemunehew paw pe wà no. **37** Uzapizapi amo ita tetea'u pupe wà no, wazuka pà wà no. Ukixi amo wà no, te uepi'ài'ág wanetekwer wà no. Uzuka amo takihepu pupe wà no. Amo wata waiko Àràpuhàràn piper imunehew pà uezeh wà, ta'e naheta kwaw kamir hekuzar katu ma'e wanupe wà xe. Ma'e hereko 'ymar romo wanekon wà. Teko upuraraw kar ma'erahy wanupe wà. Uzapo ikatu 'ym ma'e wanupe wà. **38** — Ma'e heityk pyrer ài wanekon wà, i'i amo uzeruzar 'ym ma'e wà, a'e uzeruzar ma'e wanupe wà. — Ikatu ihewe wà, i'i Tupàn a'e uzeruzar ma'e wanupe. — Ikatu 'ym ma'e, i'i uzeruzar 'ym ma'e wà. — Pekatu wera'u ihewe, amogwer ywy reh har wanuwi, i'i Tupàn a'e uezeh uzeruzar ma'e wanupe. Uzàn amo wà, ywyxig heta haw reh wata pà wà. Oho ywytyr reh wà no. Itakwaruhu pupe uzapo weko haw wà. Ywykwaruhu pupe uzapo weko haw wà no. **39-40** Azeharomoete ximume'u wanemipa kwer zanezeupeupe kury. Ta'e uzeruzar Tupàn reh wà xe. A'e rupi Tupàn upytywà a'e wà no. Tupàn umume'u wemipa ràm ikatu ma'e a'e, wanupe a'e. A'e teko uzeruzar ize'eg reh wà. Nuexak kwaw a'e ma'e wà. Tupàn numukatu kwaw a'e teko a'e ar mehe wà. — Tuwe rihi, i'i wanupe. — Amo 'ar mehe amukatu putar herehe uzeruzar ma'e paw rupi katete ihe wà nehe, i'i. — A'e 'ar mehe a'e herehe uzeruzar ma'e kwehe arer wiko putar ikatuahy ma'e romo heruwa rupi a'e wà nehe no, amogwer wainuinuromo a'e wà nehe no. Ta'e nezewe ikatu wera'u ihewe nehe xe, i'i Tupàn a'e, a'e uzeruzar ma'e wanupe a'e.

Tupàn zaneru romo hekon a'e

12 ¹Aze'eg putar peme zanerekò haw rehe ihe nehe kury. Heta tetea'u a'e zanerexakar zaneiwyr a'e wà. Uzeruzar tuwe Tupàn rehe wà. Tuwe zazeruzar hehe wazàwegatete nehe no. Aze amo ma'e zanemunyryk kar iko Tupàn wi nehe, xityk a'e ma'e nehe. Aze awa upirapoz oho nehe, aze upyhik amo nehe, numuhem kar wi kwaw uzewi 'y pupe nehe. Nezewegatete aze teko uzapo ikatu 'ym ma'e tuweharupi wà nehe, zawaiw katu wapytu'u haw wà nehe. Zatyryk agwer ikatu 'ym ma'e wi nehe. Zaiko uzàn ma'e zàwe zane. Aze amo izàn wer nehe, nueraha kwaw ipuhuz katu ma'e uezupi nehe. Nezewegatete zanepureruzar wer Zezuz rehe zane. A'e rupi, tuwe zapytu'u ikatu 'ym ma'e iapo re nehe. Ikatu 'ym ma'e iapo mehe nazanezeruzar wer kwaw hehe. Uzàn ma'e izàn wer tuwe a'e. Tuwe zanezeruzar wer tuwe Zezuz rehe nehe. **2** Ximonokatu zanereha xo Zezuz rehe zo nehe. Nezewegatete zanema'enukwaw katu Zezuz rehe no, ta'e zanepyro a'e xe. — Pezeruzar herehe nehe, i'i Zezuz zanewe izypy mehe. — Pezeruzar herehe te iahykaw rehne nehe, i'i zanewe. Zanemuzeruzar kar har ipy romo hekon a'e, iahykaw reh har romo hekon a'e no. Naheta kwaw amo. Umào ywyra kanetar reh. — Nazemono kwaw hezezuka kar pà ywyra kanetar rehne nehe, ni'i pixik kwaw Tupàn pe. Nan. — Hekweraw ire herurywete putar ihe nehe, i'i izupe. A'e rupi nuzekaiw kwaw teko waze'eg reh. Imaranugar izuwi wà. Nuzekaiw kwaw wanehe. Uzemono uzezuka kar pà ywyra kanetar reh. Wapyk in Tupàn henaw iawyze har reh har reh kury. Tuwhiaw romo hekon ipyr kury.

3 Pema'enukwaw imào awer reh nehe, ma'erahy hemipuraraw kwer reh nehe no. Teko ikatu 'ym ma'e iapo har na'iakatuwawahy kwaw hehe a'e wà. A'e rupi aze teko na'iakatuwawahy kwaw penehe wà nehe, pezemumikahy zo nehe. Pepytu'u zo hehe pezeruzar ire nehe. **4** Pemume'u ze'eg puràg peiko purupe. — Pepytu'u ikatu 'ym ma'e iapo re nehe, peze peiko wanupe. A'e

rupi na'iakatuwawahy kwaw penehe wà. Napezuka kwaw wà rihi. **5** Nezewe Tupàn uze'eg wa'yr wanupe a'e, wamukàg kar pà a'e, uze'eg imuapyk kar pà amo pe pape rehe a'e. Aipo peneharaz iz'e'eg wi pe. Nezewe i'i a'e.

— Hera'y, aze Zanezar upuraraw kar ma'erahy newe nehe,

neremiapo kwer ikatu 'ym ma'e
rehe nehe, nereruze'eg pà nehe,
ezekaiw katu hehe nehe.

Aze umume'eahy neremiapo kwer
ikatu 'ym ma'e newe nehe,
epytu'u zo hehe nezeruzar ire nehe.

6 Ta'e nezewe xe.

Aze Zanezar uzamutar katu amo
nehe, upuraraw kar putar ma'erahy
izupe nehe, heruze'eg pà nehe.

Aze — Hera'y, i'i amo pe nehe,
umume'eahyahy hemiapo kwer
ikatu 'ym ma'e izupe nehe no.

Upuraraw kar ma'erahy izupe nehe.
A'e rupi ta'yr upytu'u ikatu 'ym
ma'e iapo re nehe.

7 Aze kwarer uzapo ikatu 'ym ma'e nehe, tu
uzepyk putar hehe nehe. Nezewegatete
pepuraraw ma'erahy peiko kury. **8** Awa
uzepyk wa'yrete rehe a'e, ikatu 'ym ma'e iapo
re imupytu'u kar pà a'e. Aze kwarer wiko amo
awa ta'yr romo nehe, a'e awa uzepyk putar a'e
kwarer rehe a'e nehe, aze a'e kwarer uzapo
ikatu 'ym ma'e a'e nehe. (Nezewe mehe a'e
kwarer a'e, awa ikatu ma'e romo hekon putar
a'e nehe, ta'e tu weruze'eg a'e xe.) Aze kwarer
nuiko kwaw amo awa ta'yrete romo a'e nehe,
a'e awa nuzepyk kwaw hehe nehe. Nezewegatete aze amo
uzeruzar ma'e uzapo ikatu 'ym ma'e wà nehe, Tupàn upuraraw kar
putar ma'erahy wanupe nehe. Aze Tupàn
nueruze'eg kwaw a'e wà, a'e teko nuiko kwaw
Tupàn hemiruze'eg romo a'e wà. **9** Zaneru
ywy rehe har a'e wà, uzepyk zanerehe a'e wà,
zanekwarer mehe a'e wà. Ximuawate katu
zane wà. Nezewegatete tuwe xiruzar zaneru
ywate har zane. Tuwe zaiko hemiruze'eg
romo nehe no. **10** Zaneru uzepyk zanerehe
wà, zanekwarer mehe wà, aze zaneremiapo

kwer na'ikatu kwaw wanupe. Tupàn
upuraraw kar ma'erahy zanewe a'e, ta'e
ipurumukatu wer zanerehe a'e xe. Ta'e
ipurumuigo kar wer zanerehe ikatuahy ma'e
romo a'e xe, uzezàwegatete a'e xe. **11** Aze
amo uzepyk zanerehe, a'e 'ar mehe
zazemumikahy zane. Nazanerurywete kwaw
a'e 'ar mehe. — Azeharomoete a'e ma'erahy
ipuraraw paw ikatu ihewe a'e, za'e izupe amo
a'e 'ar mehe. Ta'e nezewe zanemuigo kar ikatu
wera'u ma'e romo a'e xe. A'e rupi zaiko
puràmàtyry'ym 'ymaw rehe zane kury.

**— Peho katu Tupàn hape rupi nehe,
i'i wanupe a'e kury**

12 Aze awa nahuhàg kwaw nehe,
uzemumikahy putar a'e nehe. Peiko zo
nezewe nehe. Pekàg tuwe pezeruzar haw
rehe. Penurywete nehe. **13** Aze awa wahaw
ka'a nehe, wata putar pe rupi nehe. A'e mehe
nukàzym kwaw nehe. Nezewegatete peho
katu tuwe Tupàn hape rupi nehe. A'e rupi
uzeruzar ma'e ikàg 'ym ma'e ukwaw putar
Tupàn ze'eg heruzar haw a'e wà nehe no.
Oho putar hape rupi wà nehe no.

14 Pereko katu amogwer teko paw rupi
katete pe wà nehe, wàmàtyry'ym 'ym pà pe
wà nehe. Peiko ikatu 'ym ma'e iapo pixik
'ymar romo nehe. Peiko ikatuahy ma'e romo
Tupàn zàwe nehe. Aze teko nuiko kwaw
ikatuahy ma'e romo wà nehe, nuexak kwaw
Zanezar wà nehe. **15** Tupàn upurupuhareko
a'e. A'e rupi upurupyro ikatu 'ym ma'e wi.
Pezewyr zo izuwi nehe. Pezypyrog wi zo
ikatu 'ym ma'e iapo pà nehe. Aze teko u'l ka'a
iaiw ma'e wemí'u inuromo wà nehe, ima'eahy
putar wà nehe. Nezewegatete aze amo
uzeruzar ma'e uzypyrog zuapyr wi ikatu 'ym
ma'e iapo pà nehe, aze ru'u amogwer uzeruzar
ma'e uzapo putar ikatu 'ym ma'e izàwe a'e wà
nehe no. **16** Peiko zo Ezau ài nehe. Tupàn rehe
uzekaiw 'ym ma'e romo hekon a'e. Zako
tyky'yr romo hekon a'e. A'e rupi tu
ipurumume'u wer zepe uma'e rehe paw rupi
izupe a'e, ipurumume'u wer zepe uiwy rehe
paw rupi izupe a'e no, umàno etea'i mehe a'e.
Ezau ume'eg a'e ma'e paw rupi wywyr pe,

temi'u pixika'i ma'e hekuzaromo. **17** A'e re amo ae 'ar mehe uputar zepe a'e ma'e a'e ywy paw rupi a'e. — Emur nema'e neywy ihewe nehe, i'i u pe. — Nan, ereme'eg tuwe nema'e ràm paw kwez nerywyr pe, a'e rupi nerywyr upyhyk putar hema'e heywy hemànò re a'e nehe, i'i tu izupe. Uzai'o tyky'yr. Nupyhyk kwaw.

18 Kwehe mehe Tupàn umume'u uze'eg zutew wanupe a'e, ywytyr Xinaz her ma'e rehe a'e. Ukyze izuwi wà. Oho ywytyr huwake wà. Wexak tata ywytyr rehe wà. Ipytun a'e pe. Àmàn uweraweraw a'e pe ywytyr rehe. Ta'e Tupàn wiko a'e pe a'e xe. Napexak kwaw agwer ma'e ko 'ar rehe. **19** Amo upy uxì'äm a'e. Amo uze'eg ahayah a'e no. Henu mehe teko uze'eg izupe wà. — Epytu'u neze'eg ire nehe, i'i izupe wà. **20** Ta'e a'e uze'eg ma'e uzapo kar zawaiw katu ma'e wanupe a'e xe. Nezewe i'i a'e ze'eg wanupe a'e. — Aze peneimaw uhem 'àg ywytyr rehe nehe, aze upyrog hehe nehe, pezapizapi ita pupe nehe, izuka pà nehe, i'i Tupàn wanupe. Ukyze zutew a'e ze'eg wi wà. **21** Ukyze katu a'e ma'e hexak mehe wà. Moizez uze'eg izupe a'e no. — Aryryryryz teko ihe, ta'e akyze newi ihe xe, i'i izupe.

22 Napeiko kwaw a'e ywytyr huwake har romo. Napekyze kwaw Tupàn ize'eg henu mehe. Peiko putar Xiàw ywytyr rehe nehe, Tupàn heko haw pe har rehe nehe. Tupàn uzapo tawhu a'e pe a'e. Zeruzarez ywate har taw her romo a'e. Heta tetea'u Tupàn heko haw pe har a'e pe wà no. Peiko putar a'e pe nehe no. **23** Peiko putar amogwer uzeruzar ma'e kwehe arer wainuromo nehe. Tupàn ta'yì ài wanekon wà. Penky'yr ài wanekon wà. Hurywete uzemono'og pà Tupàn pyr wà. Tupàn umuapyk waner ywate a'e. Pezur Tupàn pe kury. A'e ae teko wanemipa kwer paw imume'u har romo hekon a'e. Uzepyk ikatu 'ym ma'e iapo har wanehe. Upyro ikatu ma'e wà no. Tupàn umukatu tuwe uzeruzar ma'e a'e wà. — Ikatu 'ym ma'e iapo pixik 'ymar ài peiko heruwa rupi kury, i'i Tupàn wanupe. Peiko wainuinuromo kury. **24** Pezur kwez Zezuz pe no. Uzakook uwyl kwer

zanepyro pà a'e. Pema'enukwaw Apew huwykwer rehe. — Ezepyk izuka arer rehe nehe, za'e Tupàn pe zane, hehe zanema'enukwaw pà zane. Pema'enukwaw Zezuz huwykwer rehe. — Zanepyro uwyl kwer pupe a'e, za'e izupe. Ze'eg ipyahu ma'e izar romo hekon a'e. Umekuzar zaneremiapo kwer ikatu 'ym ma'e a'e, umànò mehe ze'eg ipyahu rupi a'e.

25 Pezekaiw katu Tupàn ze'eg imume'u har wanehe nehe. — Nuruzeapyaka kwaw nerehe nehe, peze zo izupe nehe. Amo teko kwehe arer a'e wà, nuzeapyaka kwaw Tupàn ze'eg imume'u har ywy rehe har rehe a'e wà. Tupàn uzepyk wanehe. Ko 'ar rehe Tupàn ywate har uze'eg iko purupe kury. Aze teko nuzekaiw kwaw hehe wà nehe, Tupàn uzepyk putar tuwe wanehe nehe no. **26** Xinaz ywytyr rehe uze'eg mehe umuryryryryz kar Tupàn ywy a'e. — Amuryryryryz kar zuapyr wi putar ywy ihe nehe, ywak ihe nehe no, i'i kwez purupe kury. **27** Umuryryryryz kar putar wemipa kwer a'e wà nehe, wamukàzym kar pà a'e wà nehe. Numuryryryryz kar kwaw weko haw pe har wà nehe. (Nazakàzym kwaw nehe.)

28 Ximume'u ikatu haw nehe. Ta'e zaiko hemiruze'eg romo zane xe. Ta'e nazanemumaw kwaw a'e nehe xe. Ta'e nazanemukàzym kwaw nehe xe. Tuwe ximume'u ikatu haw nehe. Ta'e upurupuhareko katu a'e xe. Ximuawate katu nehe, hemimutar rupi nehe, izuwi zanekyzé pà nehe. Ximuete katu nehe, ikàgaw imume'u pà nehe. **29** Ta'e Zanezar Tupàn a'e xe, tata uhua'u ma'e ài hekon a'e xe, ma'e hapy har ài hekon a'e xe. Aze tata uhua'u ma'e wapy ma'e nehe, a'e ma'e ukaz paw putar nehe. Nezewegatete Tupàn uzepyk putar tuwe wemiruze'eg 'ym wanehe nehe.

**Pemume'u Tupàn ikatu haw izupe nehe,
i'i wanupe a'e kury**

13 ¹Peiko penywyr ài pezeupeupe, ta'e pezeruzar Zaneruwiawete rehe pe xe. A'e rupi pezeamutamutar katu wi wi nehe. **2** Pemuixe katu kar uzeruzar ma'e amo

ae taw pe har penàpuz me pe wà nehe. Aze ru'u Tupàn ze'eg imume'u har romo wanekon a'e wà nehe. (Aze ru'u Tupàn heko haw pe har ywy rehe ur ma'e kwer romo wanekon a'e wà nehe.) Kwehe mehe Àmàrààw umuixe kar mokoz awa wàpuz me a'e wà. Nukwaw kwaw waner. Tupàn heko haw pe har awa romo uezapo ma'e kwer romo wanekon wà. Wixe hâpuz me uzekwaw kar 'ym pà izupe wà.

3 Tuwihaw umunehew kar amo uzeruzar ma'e zemunehew paw pe a'e wà, ta'e a'e tuwihaw na'iakatuwawahy kwaw Zezuz rehe a'e wà xe. Pepatyàgatu a'e zemunehew paw pe har pe wà nehe. Aze ru'u tuwihaw pemunehew putar amo 'ar mehe wà nehe no. Teko upuraraw kar ma'erahy amo uzeruzar ma'e wanupe a'e wà no, ta'e Zezuz na'ikatu kwaw a'e teko wanupe a'e xe. Pepatyàgatu a'e uzeruzar ma'e pe wà nehe no. Aze ru'u pepuraraw putar ma'erahy nezewegatete amo 'ar mehe nehe no.

4 Aze awa hemireko nehe, aze kuzà imen nehe, pemiuawate katu wazereko haw nehe. Aze awa hemireko nehe, tuwe noho kwaw amo ae kuzà puhe nehe. Aze kuzà imen nehe, tuwe noho kwaw amo ae awa puhe nehe. Aze awa oho wemireko 'ym puhe nehe, Tupàn uzepyk putar hehe nehe. Aze kuzà oho umen 'ym puhe nehe, Tupàn uzepyk putar hehe nehe. Tupàn uzepyk putar kuzàwyzài wanehe nehe. Tupàn uzepyk putar kuzàwyzài puhe oho ma'e wanehe nehe no.



5 Aze ma'e pixika'i ma'e perekó nehe, aze penemetarer pixika'i nehe, penurywete nezewe mehe nehe. — Aze heremetarer tetea'u nehe, xo a'e mehe zo herurywete putar ihe nehe, peze zo nehe. Ta'e nezewe i'i Tupàn a'e xe. — Naha pixik kwaw pewi ihe nehe. Napuir pixik kwaw pewi ihe nehe, i'i zanewe a'e xe. **6** A'e rupi, tuwe nazakyze kwaw ma'e wi nehe. Tuwe zaze'eg nezewe nehe.

— Zanezar a'e, heptyywà har romo hekon a'e.
Nakyze kwaw ma'e wi ihe nehe.
Teko nupuner kwaw hemono kar
haw rehe tatahu pe wà nehe,
tuwe za'e nehe.

7 Pema'enukwaw katu peneruze'egar izypy mehe arer wanehe nehe. Umume'u Tupàn ze'eg peme a'e wà. Pema'enukwaw waneko awer rehe nehe, wamàno awer rehe nehe. Peiko wazàwe nehe, pezeruzar Tupàn rehe wazàwegatete nehe no. **8** Zezuz Zanezar a'e, ikatuahy kwehe mehe a'e. Ikatuahy ko 'ar rehe no. Ikatuahy putar tuweharupi nehe no. Nuzawy pixik kwaw nehe. **9** Teko umume'u putar amo ae ze'eg wà peme a'e wà nehe, Tupàn ze'eg azeharomoete har imume'u 'ym pà peme a'e wà nehe. Peruzar zo waze'eg nehe. Ipurawy kar wer Tupàn hape rehe peme wà. Pezekaiw zo waze'eg rehe nehe. Tupàn zanepuhareko a'e, a'e rupi umukàg zanepy'a a'e. Ikatuahy nezewe haw zanewe. Ze'eg kwehe arer umuzekwaku kar teko temi'u tetea'u rehe a'e wà. Aze xiruzar wi wi ze'eg kwehe arer nehe, naximukàg kwaw zanepy'a nezewe mehe. Ze'eg kwehe arer heruzar har a'e wà, ma'e tetea'u rehe uzekwaku ma'e romo wanekon a'e wà. Na'ikàg wera'u kwaw uzeruzar haw rehe wà, a'e ma'e rehe uzekwaku re wà.

10 Xaxeto a'e wà, ze'eg kwehe arer heruzar har a'e wà, uzuka ma'e lyr a'e wà, teko wanemiapo kwer ikatu 'ym ma'e hekuzaromo a'e wà. Zezuz umàno

zaneremiapo kwer imekuzar pà a'e. A'e rupi naxiuka kwaw ma'ea'yr Tupàn huwa rupi kury. Ko 'ar rehe kury, ma'ea'yr zuka haw rehe uzeruzar ma'e a'e wà, nuzeruzar kwaw Zezuz imàno awer rehe a'e wà. A'e rupi nuiko kwaw Zezuz hemiruze'eg romo wà. **11** Xaxeto wanuwihow a'e, zutew wanuwihow a'e, uzuka ma'ea'yr a'e. A'e re weraha huwykwer tòpuzuhu ipupyaiyaw pyrer inugwer pupe. Omono Tupàn pe tekow wanemipa kwer ikatu 'ym ma'e hekuzaromo. Umunyk tata ma'ea'yr hetekwer iwy pe hapy pà katu pe taw huwak. Ta'e Tupàn ze'eg kwehe arer uzapo kar nezewa haw izupe a'e xe. **12** A'e rupi Zezuz a'e no, umàno muite taw wi a'e no, ywyxig heta haw pe a'e no. A'e rupi umukatu tekó a'e wà, wanemipa kwer ikatu 'ym ma'e wi a'e wà, uwu kwer pupe a'e wà. **13** Teko uzuka Zezuz ywyra kanetar rehe a'e wà, muite taw wi a'e wà. — Upuruzuka ma'e, i'i muau'u izupe wà. Uze'eg zemuiteahy putar zanerehe wà nehe no, ta'e zaiko hemiruze'eg romo zane no xe. Tuwe uze'eg wà nehe. Pepuraraw ma'erahy iżàwe nehe. Pemaranugar zo izuwi nehe, wanuwa rupi nehe. **14** Ta'e naheta kwaw taw zanerekoko hawete zanewe ko ywy rehe a'e xe, ko 'ar rehe a'e xe. Amo 'ar mehe Tupàn uzapo putar tawhu zanewe a'e nehe, zanerekoko àwàm romo a'e nehe. Xiàro a'e pe zanerekoko àwàm zaiko zane. **15** A'e rupi, tuwe ximume'u Tupàn ikatu haw izupe tuweharupi nehe, ta'e Zezuz umàno zanerekuzaromo a'e xe. Kwehe mehe tekó omono ma'ea'yr Tupàn pe wà. Ikatu haw

zaneremimume'u ràm a'e no, ikatu Tupàn pe a'e no. Ikatu haw imume'u haw nuzawy kwaw a'e ma'ea'yr imono pyrer a'e. Naximono kwaw ma'ea'yr izupe kury. Ximono zaneze'egatu haw izupe kury. — Uruzeruzar tuwe nerehe ure, za'e izupe kury. **16** Pezapo ikatuahy ma'e pezepeupe nehe, pepytu'u 'ym pà nehe. Pezepetywàtuyà nehe no, pepytu'u 'ym pà nehe no. Ta'e agwer ma'e iapo haw ikatu Tupàn pe a'e xe. Nuzawy kwaw ma'e imono pyr izupe.

17 Uzeruzar ma'e waneruze'egar a'e wà, uzekaiw katu penehe a'e wà, peneraha katu pà Tupàn hape rupi a'e wà, upytu'u 'ym pà a'e wà. Peruzar peneruze'egar waze'eg pe wà nehe. Pezekaiw katu waze'eg rehe nehe. Ta'e amo 'ar mehe umume'u putar wemipa kwer Tupàn pe a'e wà nehe xe. Aze peruzar waze'eg nehe, hurywete putar Tupàn pe uma'ereko mehe wà nehe. Aze naperuzar kwaw nehe, uzemumikahy putar wà nehe. Nezewa mehe naapeptywàgatu kwaw a'e wà nehe.

18 Peze'eg wi wi Tupàn pe urerehe tuweharupi nehe. Azeharomoete nuruzapo kwaw ikatu 'ym ma'e ure. Ta'e urepurapo wer tuwe ikatuahy ma'e rehe tuweharupi ure xe. **19** Aenoz putar ma'e peme ihe nehe kury. Peze'eg tuweharupi Tupàn pe pepyr heho àwàm rehe nehe. — Emur kar neze'eg imume'u har xe urewe tárityka'i nehe, peze izupe herehe nehe, tuweharupi nehe.

Zaze'eg Tupàn pe nehe

20 Àràpuhàràn wanehe uzekaiw ma'e a'e, uzekaiw katu weimaw wanehe a'e.



Nezewegatete Zanezar Zezuz uzekaiw katu zanerehe a'e no, ta'e umàno zanerekuzaromo a'e xe. Tupàn umugweraw kar Zezuz a'e, imàno re a'e. Upyro putar uzehe uzeruzar ma'e paw rupi a'e wà nehe no. Noho pixik kwaw tatahu pe wà nehe, ta'e Tupàn umume'u waho 'ym àwàm a'e xe, ta'e Zezuz umàno wanekuzaromo a'e xe. **21** Tupàn umupytu'u kar teko wazeàmàtyry'ym ire a'e wà. Umurywete kar a'e wà. Tuwe omono ikatu ma'e penemimutar peme paw rupi katete nehe. A'e mehe pepuner hemiapo putar haw iapo haw rehe nehe. Tuwe zanemuigo kar ikatu ma'e romo wemimutar rupi nehe, ta'e Zaneruhawete Zezuz umàno zanerekuzaromo a'e xe. Tuwe teko umume'u Zaneruhawete ikàgaw ipuràg eteahy haw tuweharupi wà nehe, upytu'u pixik 'ym pà wà nehe. Azeharomoete.

Umume'u ze'eg iahykaw rehe har a'e kury

22 Amuapyk heze'eg kwez ko pape rehe ihe, pemurywete kar pà ihe. Pepytu'u zo pezeappyaka katu re nehe, imugeta mehe nehe. Ta'e na'ipukua'u kwaw a'e xe.

23 Akwaw kar putar ma'e peme ihe nehe kury. Tuwiaw umunehew kar zanerywyr Ximot a'e wà, zemunehew paw pe a'e wà, ta'e umume'u Tupàn ze'eg purupe a'e xe. Umuhem kar zemunehew paw wi a'e wà kury. Aze ur xe ko 'ar rehe nehe, araha putar hezeupi nehe, pepyr heho mehe nehe.

24 Pemono ureze'eg peneruze'egar wanupe nehe, Tupàn hemiruze'eg nànàgatu nehe no. Uzeruzar ma'e Itar ywy rehe har omono uze'eg peme a'e wà no.

— Pekatu pa, i'i peme wà.

— Pekatu ma, i'i peme wà.

25 Tuwe Tupàn pepuhareko wi wi a'e nehe, ikatuahy ma'e iapo pà peme a'e nehe. Upaw kwez kury.

XIAK

1 ¹ Ihe Xiak ihe, Tupàn pe uma'erekma'e romo aiko ihe. Zezuz Zaneruhawete Zanezar pe uma'erekma'e romo aiko ihe. Amono kar putar ko hepape ihe nehe, Tupàn hemiruze'eg wanupe ihe nehe, ywy nànàn uhàuhàz ma'e kwer nànàn ihe nehe.

Xiak uze'eg zanezeruzar haw rehe a'e kury, zaneremigwaw rehe a'e no

2 Herywyr wà, hereinyr wà. Aze pepuraraw ma'erahy nehe, wyzài ma'erahy nehe, aze uzeruzar 'ym ma'e uzapo wyzài ikatu 'ym ma'e peme wà nehe, penurywete nehe. **3** Ta'e ma'erahy ipuraraw mehe pekàg wera'u putar pe xe. Pezeruzar wera'u putar pe xe. Aze pepuraraw wyzài ma'erahy nehe, Zezuz rehe pezeruzar ire pepytu'u 'ym pà nehe, pekàg wera'u putar nehe no. Pekwaw nezewe pezemukàg kar haw. **4** Pezeruzar wiwi nehe, pepytu'u pixik 'ym pà nehe. Nezewe mehe

peiko putar ikatuahy ma'e romo nehe. Peiko putar ikatu 'ym ma'e iapo 'ymar romo nehe. Peiko putar Tupàn hemiapo putar haw paw iapo har romo nehe no. Peiko putar peho Tupàn hemimutar rupi katete nehe no. **5** Aze amo pepyr har nukwaw katu kwaw Tupàn hemiapo putar haw nehe, tuwe uze'eg Tupàn pe nehe, ma'e henoz pà izupe nehe. Tupàn ukwaw kar putar izupe nehe. Ta'e nahekyt'yim kwaw a'e xe. Umur tuwe ma'e tetea'u teko wanupe a'e, ta'e upuhareko katu a'e wà xe. A'e rupi ukwaw kar putar wemapiro putar haw wyzài teko wanupe a'e nehe. **6** Pezeruzar tuwe hehe nehe, izupe peze'eg mehe nehe. — Aze ru'u Tupàn numur kwaw hereminozgwer ihewe nehe, peze zo nehe. Nezewe uze'eg ma'e a'e wà, uzeruzar katu 'ym ma'e a'e wà, 'yopenogaw ài wanekon a'e wà. Ywytu weraha 'yopenogaw wemimutar rupi a'e. Ko rupi, kwe rupi no. Xe kutyr, pemutyr